



8

3-D

38



D. 38












DISCOVERS

DE LA LEGATION

DE MONSIEVR LE

Duc de Neuers.

*Enuoyé par le Tres-Chrestien Roy de France
& de Nauarre, HENRY IIII. vers
le Pape CLEMENT VIII.*



. A PARIS,

Chez IAMET METTAYER, & PIERRE
L'HVILLIER, Imprimeurs &
Libraires ordinaires du Roy.

M. D. XCIIII.

Avec privilege de sa Maiefté.







L'IMPRIMEUR
AUX LECTEURS.

BIBLIOTECA NAZIONALE
ROMA
VITTORIO EMANUELE

MESSIEURS, *Le Discours de*
Monfieur le Duc de Ne-
uers sur ce qu'il a traicté à Ro-
me pour le Roy & le Royaume, estant tom-
bé entre mes mains, i'eusse pensé grandemēt
preiudicier au public de l'en frustrer, tant il
est rare, excellēt, & qui merite estre enten-
du non seulement de la France, mais aussi
de toute la Chrestienté, afin qu'elle cognois-
se le zele extreme & deuotion de sa Majesté
au repos de l'Eglise, ensemble son sainct de-
sir d'arracher les schismes & diuisions, que
l'ambition de noz ennemis, principe de ces
maux, matiere de ces feux, mouuement de
ces desordres, & source de ces torrents de

EPISTRE.

*confusion semé dans ce sacré pourpris, non
 avec la main, mais à plaine poche, comme
 anciennement a esté dict. Pour à quoy par-
 uenir, il n'a voulu oublier aucun point de
 l'humilité Chrestienne, ayant mis sous le
 pied les pompes & grandeurs humaines
 pour se rendre digne des celestes, effacé le
 fard d'un honneur fuitif, & couuert la
 splendeur d'une gloire mal coloree, pour
 suyure le vray honneur, & reluire de la
 solide: voire mesmes l'apprehension &
 crainte de veoir de nouveau rompre & des-
 pecer la robe inconsutile du Seigneur, ont
 peu si auant sur luy, qu'il a esbresché aucu-
 nement ceste gloire solide, & abbaisé ceste
 Couronne de liberté, que par le tesmoigna-
 ge mesmes des Italiens il porte par dessus
 les autres Roys & Princes Chrestiens. Car
 vous verrez par la suite de ce Discours
 des submissions qui semblent passer outre
 ce qui est de la grandeur de la France, &
 des immunitez que l'Eglise Gallicane a*

tousiours courageusement retenu, & constamment conserué avec vn ordre tant bien estably, que quand on l'a voulu remuer, les Roys, le Clergé, & la Cour de Parlement sy sont opposez par bons, iustes & legitimes moyens: Tellement que les Papes les recognoissans veritables, s'en sont deportez. Ainsi par tout a esté recogneuë la franchise de ce Royaume, & de son Eglise, qui pour telle & si honorable marque a esté tousiours appellé pays libre, au lieu que le reste de la Chrestienté s'appelle pays d'obeissance. Ce n'est pour exclure vne obeissance filiale & liberale enuers l'Eglise, & vne singuliere affection à l'endroiect de son premier siege, dont ont esté rendus plusieurs grands & illustres tesmoignages, de façon que la France a esté nommee le fanal de la foy, l'asyle des Papes, & le carquois admirable ceint au costé de Dieu, dont il tire fleches choisies pour les descocher avec l'arc de son bras puissant cõtre l'infidelité.

EPISTRE.

7 Mais c'est pour ne s'assuiection à vne reco-
 gnoissance non deue, ny requise ny rendue
 au premier & neantmoins plus parfaict
 aage de l'Eglise, sous laquelle les autres
 peuples par leur impuissance, diuision &
 imprudence se sont laissez asservir. Que si
 en cet endroict ces preeminences sont aucu-
 nement raualees, & ceste dignité retran-
 chee, cela n'estant que pour en rendre da-
 uantage à l'Eglise vniuerselle, est vn tes-
 moignage certain de la reuerence que sa
 Maiesté luy porte. Et bien qu'il semble que
 ce soit autant s'oster d'auctorité qu'il en
 quitte à autruy, ne plus ne moins que tirāt
 quelques ruisseaux d'un grand fleuve, c'est
 diminuer la force de son cours: Si est-ce
 qu'il estime son Royaume si conioinct avec
 l'Eglise, qu'il iuge l'honneur qu'il luy a faict
 en la personne de celuy qui y tient le pre-
 mier lieu, estre le sien propre. Honneur qui
 est encores plus remarquable en ce qu'il a
 esté offert & rendu non par quelque person-

ne commune, mais par un Prince tres-il-
lustre avec la noblesse ancienne, duquel com-
bat sa propre vertu à qui des deux l'ornera
dauantage. Il faut donc croire, que nostre
S. Pere le Pape de longuemain a esté preue-
nu contre la verité & la raison, puis qu'il
n'a encores esté touché de ce respect non or-
dinaire, ny esmeu des graues & sages re-
monstrances tant de fois reiterees, ny par-
ticulierement ressenty l'heur de son pontifi-
cat pour l'acquisition si rare à l'Eglise d'u-
ne ame si precieuse, de laquelle les cieux se
resiouyssent, & la terre se console: veu mes-
mes qu' auparauant qu'il fust esleué en ce
sainct Siege on a remarqué en luy plusieurs
signes d'esprit moderé, desireux du bien, a-
mateur du repos commun, & ennemy de fa-
ctions & coniurations. Qu'il aduise donc
par sa prudence à ne donner nouueau su-
iect d'accuser les puissances & grandes au-
toritez de peruertissement du naturel des
hommes. Qu'il songe que comme celuy qui

E P I S T R E.

ayant emprunté de ses amis, dissipe le sien avec le leur, est digne de plus grande reprehension que celuy qui dissipe le sien seul. De mesme qui par l'esperance donnée s'est rendu debteur de bonnes & loüables actions, & ne les rend. Encores est-il plus blasmable de tromper l'esperance que le creancier, d'autant que cestui-cy peut s'acquitter de ce qu'il doit par la seule volôté, sur laquelle la fortune n'a aucun droit ny pouuoir.

Nous aduoüerons neātmoins que la superbe Espagnolle, vne des mains pernicieuses de la fortune, se monstre plus entreprenante qu'elle, en ce que tenant le corps & l'Estat de sa Saincteté assiegez, entreprend d'assuiectir sa Volonté à ses tyranniques desseings. Mais nous esperons que bien tost il pensera à luy, & recognoistra telle indignité, ne laissant eschapper si belle & iuste occasion pour se tirer de ceste seruitude, remettre le Pontificat en liberté, & luy rendre la dignité qui luy appartient. Il luy est

plus honorable d'estre tenu pour pere cõmun
des Chrestiens, vray heritier des Apo-
stres, & en Primat nous representer Abel,
en gouuernement Noé, en ordre Melchise-
dech, en dignité Aarõ, en auctõrité Moÿse,
Tiltres donnez au Pape par vn Docteur
François: que de se rendre partial voire
ministre d'un Prince affectant l'usurpatio
de la Chrestienté: de maniere qu'on soit cõ-
trainct de ne prẽdre ce qui viendra de Ro-
me, pour autre chose que pour oracles de la
Pythias, qui philippise. Dieu moteur des
cœurs le vueille bien inspirer, & ramener
à ce qui est du repos de l'Eglise, & de l'hon-
neur du S. Siege, & que si la voix n'a dõné
entree à ces remõstrances que dans son au-
reille, maintenant redigees par escript elles
puissent penetrer iusques au plus profond
de son ame. Adieu.





DISCOVRS DE LA
LEGATION DE MONSIEVR
le Duc de Neuers.

*Enuoyé par le Tres-Chrestien Roy de France &
de Nauarre, HENRY III. vers le Pape
CLEMENT VIII. en l'annee 1593.*

RES-SAINCT PERE,
T SELON que i'ay tous-
 iours dressé mes actions à
 la gloire de Dieu, & au de-
 uoir d'un Prince nay d'il-
 lustre famille, & pour ce
 mesprisé ma vie, mes biens, & les vanitez
 mōdaines: Ainsi, Pere Sainct, i'ay dés mon
 arriuee à voz piedz desiré que vostre Sain-
 cteté fust esclaircie, que ce voyage long,
 fascheux & incommode, que i'ay entrepris
 en l'aage & estat auquel ie suis, ne proue-
 noit d'aucun mien interest particulier, que
 i'eusse en Italie, ny en France, & qu'à cet

effect ie renonçois dès à present à toutes les supplications & requestes, que ie pourrois faire à vostre Sainteté, soit d'un chapeau de Cardinal, ou d'Euesché & d'Abbaye, & à toutes autres graces & concessions, qu'elle pourroit accorder à ma recommandation, parce que i'estois resolu de ne vous en demander aucune, tãdis que ie serois employé en l'affaire, pour lequel i'estois venu vers elle. D'ailleurs que ie n'esperois ny voulois de mon Roy autre ny plus grande charge, que le gouuernement de la Chãpaigne, que le feu Roy, que Dieu absolue, auoit donné à mon fils en recompense de mes seruices, & ce pour les raisons, que ie luy en ay deduites. Finalement que ie n'auois recogneu l'affaire, que ie portois estre en soy si honorable & accoustumé d'estre dōné à personne de grãde qualité qu'il me deust induire à le rechercher sans auoir esgard à l'incōmodité qu'il m'apporteroit, tant en ma personne, qu'à la Duchesse ma femme, à mes terres & à ma charge par mon esloignement d'avec eux, pour ne pouuoir leur donner l'assistance, que ie leur doibs. Et partant i'ay supplié vostre Sainteté de croire, que l'occasion

seule qui m'auoit acheminé de pardeça, auoit esté l'assurance, que i'auois pris (obeissant aux commandemēs de mon Roy) de faire chose tres-agreable à vostre Saincteté, profitable à nostre Frāce & à la Chrestienté, honorable pour moy & à ma posterité, & salutaire à mon ame, cuidant par la reconciliation, que i'esperois faire de mō Roy avec vostre Saincteté, voir cesser tant de maux, qui trauaillent les Catholiques de nostre Royaume. C'est pourquoy, Pere Sainct, ayant receu vn extreme regret de me voir licencié par vostre Saincteté, avec vne si rigoureuse resolution sans me dōner aucune responce: I'ay esté cōtrainct de dresser par escrit le sommaire de ce que i'ay traicté avec vostre Saincteté, & de le luy laisser à mon partement, afin de vous donner occasion de vous rēdre autant misericordieux, qu'il vous a pleu estre seuer en l'endroiēt de mon Roy penitent, comme ie veux croire, qu'il vous plaira de faire apres y auoir mieux pensé.

Et pour ce continuant mon propos, Ie diray à vostre Saincteté, qu'estant arriué à Poschiauo terre des Grisons le xiiij. Octobre, ie me trouuay fort estōné d'y voir arri-

Discours de la Legation

uer le Pere Poussuin Iesuite enuoyé de la part de vostre Saincteté, pour me faire entendre en vertu d'un brief de deux lignes seulement en sa creance, qu'elle ne pouuoit me receuoir comme Ambassadeur de mon Roy, ne l'ayant encores recogneu pour tel, sans me consoler d'un mot gracieux, que ie serois neantmoins le bien venu en autre qualité, & qu'elle me verroit volontiers, afin de m'oster l'occasion de douter qu'elle ne desirast que ie cōtinuasse mon voyage : ains seulement adiousta, que vostre Saincteté se resiouissoit de la conuersion, qu'elle auoit entendu, que sa Majesté auoit faicte, suppliāt Dieu qu'elle fust telle, qu'il appartenoit: de laquelle ambassade, Pere Sainct, ie demeuray si fort estonné, que ledit Pere Poussuin a peu faire entendre à vostre Saincteté, preuoyant un tres-mauuais cōmancement en l'affaire, que ie portois, neantmois ie me resolu de continuer mō voyage, afin de saluer Monsieur le Duc de Mantoüe mon nepueu, en esperance que vostre Saincteté prendroit ce pendant quelque bonne resolution sur ce que i'auois prié lediēt Pere Poussuin de vous faire entendre de ma part, dōt i'au-

rois occasion de m'en contenter. Arrivé que ie fus à Mantouë, ledict Pere Poussuin me fist voir la lettre, que Monsieur le Cardinal de S. George vostre nepueu luy auoit escrit le xxv. Octobre en responce de la sienne, contenant que vostre Saincteté persistoit en la mesme resolution de ne me receuoir comme Ambassadeur, sans toutesfois luy mander, qu'il eust à me dire, que elle me verroit volontiers, ny autre chose, sinon que ie pouuois m'asseurer d'estre bien aimé de vostre Saincteté, ce qu'ayant veu & bien considéré, ie me deliberay d'acheuer mon voyage, comme le Roy mon maître me l'auoit commandé, en esperance, que ayant eu l'honneur & contentement de baiser les piedz de vostre Saincteté, que elle se resoudroit à embrasser ma Legatiō, comme il appartenoit. Et pour faire paroistre à vostre Saincteté, que sa Majesté ne m'auoit despesché, que vers elle seulemēt: Ie n'ay visité ny la Seigneurie de Venise, ny Monsieur le Duc de Ferrare, ny Monsieur legrand Duc, ny Monsieur le Duc d'Vrbain, ains ie suis venu droit la trouuer pour effectuer macharge, & tesmoigner à vostre Saincteté la grāde estime, que le Roy tres-

Chrestien mon maistre faisoit du S. Siege & de sa propre personne.

M'estant donc aduancé le xv. Nouembre à la Moucha, qui est à cinq iournees de ceste ville, i'y trouuay ledict Pere Pousséuin, qui me fist de rechef voir vne lettre, que ledict sieur Cardinal de S. George luy auoit escrit le vj. dudiect mois, en responce de celle qu'il luy auoit escrit de Mantouë, luy donnant aduis de la continuation de mon voyage, par laquelle il le chargeoit de m'aduertir que l'intention de vostre Sainteté estoit, prenant les termes de la lettre, que ie vinssse à Rome avec moindre apparat de compagnie, que ie pourrois, pour ne donner aucun ombrage, que ce fust comme personne publique, ou chargée d'affaires publiques, ainsi qu'il conuenoit, afin qu'aucun ne peust faire par ma venuë iugement different de la droicte & sainte intention de vostre Sainteté, & que i'eusse agreable venant à Rome d'y venir resolu de ne m'y arrester plus de dix iours, parce que ores que vostre Sainteté, quand ie n'eusse suiuy celuy que i'ay suiuy, & que ie ne fusse party de France au nom de celuy que l'on sçait, elle m'auroit non seulement
veu

veu tres-volontiers, mais fait encores plusieurs demonstrations publiques de bienveillance, adioustant que la necessité toutesfois de ne nuire en ceste occasion à qui vostre Sainteté pour deuoir d'office est obligee de deffendre, la contraignoit à ce. Chose que vostre Sainteté pensoit que la mesme pieté & prudence me persuaderoit qu'il ne luy conuint de faire autrement. Ce qui m'estonna grandement, comme fit aussi la nouuelle, qui m'arriua presque au mesme temps, que vostre Sainteté auoit deffendu à Messieurs les Cardinaux de me visiter, & de se laisser visiter par moy, considerant, que ce n'estoit la coustume de traiter si indignement les personages de ma qualité, mesme enuoyé par vn Roy de France tres-Christien, & de si grande authorité qu'estoit sa Maiesté, neantmoins ie me resolu d'acheuer mon voyage, & satisfaire au premier commandemēt de vostre Sainteté, & pour le regard de l'autre, le remettre à m'en esclaircir de bouche, quand i'aurois l'honneur de baiser voz pieds.

Tellement que i'arriuai en ceste ville le Dimanche xxj. presque de nuiēt & en carrosse, accompagné seulement de cinquanti-

te Gentils-hommes, & entray par la porte *Angelica*, laissant celle *del popolo*, ou grand nombre de personnes m'attendoient, & vins descendre à mon logis *della Rouere*, qui est près de ladicte porte: & aussi tost i'enuoyay sçauoir, s'il plaisoit à vostre Saincteté que ce soir là ie lui allasse baiser les pieds, comme ie l'en auois le iour precedent fait supplier: ce qu'ayant trouué bon, i'ay accōply ce deuoir, & puis ie luy fis entendre ce qui est escrit au commencement, & la suppliay tres-humblement de ne me vouloir restraindre à ne demeurer en ceste ville, que les dix iours, luy remonstrant, que l'affaire, pour lequel i'estois venu, ne se pouuoit expedier en si peu de temps, & qu'il y alloit de la dignité du Roy de France tres-Chrestien mon maistre, & aussi de l'interest de mon honneur, & que l'on n'auoit point accoustumé de traicter en telle sorte les personnes venues pour affaires importants. A quoy il pleut à vostre Saincteté de me faire responce, qu'elle y aduiseroit, & en communiqueroit aux Cardinaux des deux congregations, avec lesquels elle auoit fait ceste resolution, & puis qu'elle me la feroit sçauoir. D'auantage ie la suppliay de me

permettre de visiter Messieurs les Cardinaux, comme j'auois charge expresse de faire, en general & en particulier, pour leur bailler les lettres, que sa Majesté leur escriuoit, & d'ailleurs qu'il me cōuenoit le faire pour les informer de l'affaire, que j'auois à traicter avec vostre Sainteté, surquoy elle me dit pareillement qu'elle y aduiferoit, & me le feroit sçauoir. Ce qu'à la vérité me fit douter, que la volonté de vostre Sainteté fust telle à l'endroit de mon Roy, que ie l'auois cuidé, mesme ayant trouué bon de me dire plusieurs fois & fort clairement, & de propos delibéré sur certains propos qui suruindrent touchant l'estat des affaires de la France, qu'elle ne le pouuoit absoudre *etiam in foro conscientie*. A quoy il me sembla ne deuoir pour lors répondre, puis que ie ne vous auois donné occasion de me tenir ce langage, ains de remettre à ce faire à la premiere occasion, & commencer, comme ie fis, à la premiere audience, qu'il vous pleust de me dōner le xxiiij. Nou. à informer vostre Sainteté des affaires de nostre France, & luy descouurir l'imperfection du fondemēt des iniques & mauuaises propositions, que l'on luy a fait pour

l'abuser & destourner d'effectuer le desir saint, que ie m'estois proposé, qu'elle auoit de soufleuer la Religion Catholique, & conseruer la Couronne de France entiere à vn Prince du sang Royal, & en ce faisant donner iuste occasion à vostre Sainteté de prendre meilleure resolution, que celle, qu'il me sembloit, qu'elle eust faict sur l'affaire, que j'auois à luy presenter, apres toutesfois qu'elle auroit recogneu la verité & la surprise, qu'on luy a voulu faire semblable à celle, qui a esté faicte à voz predecesseurs, particulièrement à Gregoire XIII. ce que ie la supplie vouloir faire & au plus tost, *quia periculum est in mora.*

Et parce que, Pere Saint, ie n'ay iamais pretendu de dire à vostre Sainteté, que choses toutes veritables, elle se souuiendra, s'il luy plaist, que dès le soir mesme, que ie luy baisay les pieds, ie la suppliy avec toute l'instance à moy possible, d'auoir agreable que monsieur l'Ambassadeur d'Espagne assisté des deputez des chefs de la ligue, fust present lors que ie luy parlerois des affaires de la France, afin de les contredire, s'il en estoit besoin, & de vous dire ce qu'ils en scauroient, à la charge d'estre cō-

tredits par moy en vostre presence, & en outre trouuer bon, qu'à ce faire il y fust present tel nombre de messieurs les Cardinaux, qu'il vous plairoit appeller auprès de vous, pour d'autant plus esclaircir la verité des choses, & auoir moyen de rendre vostre esprit content & resolu, comme il couenoit pour prendre telle resolution sur noz affaires, qu'il estoit necessaire, pretendant de ne luy dire rien en confidence: ains par leur mesme confession faire cognoistre à vostre Saincteté mon dire veritable: neantmoins il ne vous pleust iamais de m'accorder ceste grace, combien que ie la luy demanday par plusieurs fois avec toute l'instance à moy possible, & aussi peu qu'il luy pleust de faire, que quelque nombre de Messieurs les Cardinaux se trouuassent presens lors que ie parlerois à vostre Saincteté de tels affaires, comme il me sembloit, & que l'un & l'autre fust tres-necessaire, iuste & raisonnable. De sorte que me voyant deboutté de ma requeste ledict soir, le Mardy ensuiuant ie commençay mon propos à vous supplier de croire que mon Roy n'estoit si foible que l'on l'auoit fait, ny si aisé à le chasser de son Royaume, que l'on l'a-

uoit proposé à vostre Sainteté: Car il a en son obeissance pour le moins les deux tiers de son Royaume, & de dix mil Gentils-hômes il en a les huit mil à son seruice, & plusieurs bonnes villes, tous biē resolu d'employer leurs vies souz son authorité à soutenir la Religion Catholique, & la Couronne de France.

Le luy dis aussi que tous les Princes de la France, tant du sang royal que autres, & tous les Officiers de la Couronne, & quasi tous les gouuerneurs des Prouinces, & leurs Lieutenans, & les quatre Secretaires d'Estat, & les principaux Officiers anciens des finances estoient à son seruice, & que contre luy il n'y auoit que les Princes de la maison de Lorraine & de Sauoye, chefs de la Ligue, & quelque peu d'autre qualité, estant mort le sieur Marechal de Ioyeuse, & que des huiēt Parlemens qui estoient en France, il les auoit presque tous: car il n'estoit resté à Paris que le President Brisson des six Presidents dudit Parlement, lequel en fin fut par eux mesmes pendu, comme par vn iuste iugement de Dieu, pour auoir assisté à degrader tres-iniustement le feu Roy, duquel il auoit eu gratuitement l'e-

stat de President, que l'on ne peut estimer moins de vingt mil escus d'or: les deux Aduocats & Procureur du Roy audit Parlement estoient fortis, & quasi tous les Conseillers, lesquels sa Maiesté auoit establis partie à Tours, & l'autre partie à Chaalons. Du Parlement de Rouen, le premier President, le Procureur du Roy avec d'autres Conseillers estoient fortis de ladicte ville, pour ne vouloir recognoistre autre supérieur que le Roy. Trois Presidents des six du Parlement de Dijon, & plusieurs autres Conseillers en auoient faict de mesme. Pareillement à Thoulouze le premier President Duranty, & l'Aduocat du Roy d'Asistres-bons Catholiques, furent massacrez dès le commencement de l'annee 1589. parce qu'ils pretendoient chacun d'obeir à leur Roy: laquelle cruauté, comme elle fut tres-grande, elle achemina beaucoup des Presidents & Conseillers dudit Parlement de sortir de Thoulouze, & aller trouuer monsieur de Montmorency: Ainsi ont fait plusieurs Presidents & Conseillers du Parlement d'Aix. Et pour le regard du Parlement de Grenoble, il est du tout en l'obeissance du Roy, comme est aussi ladi-

ete Prouince. De mesme le Parlement de Bourdeaux, comme est aussi ladicte ville, & celle de Rennes, où est le Parlement de Bretagne. Parquoy vostre Sainteté peut cognoistre que l'autorité du Roy n'est si petite que lon la luy a faict. Ce qui se peut d'autant plus verifier, ayant reduit la ville de Paris en estat tel qu'elle a besoin chacune annee d'estre secourue pour l'empescher de se perdre, au lieu qu'elle a secouru en toutes les guerres passees les Roys, & tout le Royaume. La ville d'Orleans est aussi bloquee de tous costez, & par souffrance s'entretient au mieux qu'elle peut: elle seule sert de passage à ceux de la ligue sur la riuere de Loire, qui traaverse, voire diuise presque tout le Royaume de France: car tous les autres ponts & passages qui sont sur ladicte riuere iusques à Nantes, sont en l'obeissance de sa Maiesté. De sorte qu'ils n'ont que celuy seul d'Orleans, pour traaverser d'une part à l'autre de la France, qui est peu, & beaucoup incommode pour se secourir les vns les autres quand le besoin le requiert. Ce que me semble merite d'estre bien consideré par les grands capitaines, qui sçauent les moyens que l'on tiët

à vsurper vn Royaume. Chose certaine est, que si sa maiesté n'estoit plus fort que ceux de la ligue, il ne pourroit tenir bloquees lesdictes deux villes, ny faire ce qu'il faict tous les iours : en quoy l'on peut cognoistre son autorité, & la force tres-grande qu'il a en son Royaume toute autre que l'on l'a desguisee à vostre Saincteté.

Au contraire i'ay faict voir & toucher au doigt à vostre Saincteté le peu de moyē que ceux de la ligue ont de se soustenir d'eux-mesmes, & empescher que le Roy ne les chasse de son Royaume, & qu'à ceste occasion ils auoient esté cōtraints de s'appuyer au secours du roy d'Espagne, & mesme recherché celuy des Papes voz predecesseurs, pour ne tōber par terre, comme ils estoient prests de faire, & le feront toutesfois & quantes que tel secours leur manquera, ainsi que vostre saincteté l'a peu cognoistre par les lettres originales que Monsieur de Mayenne a escrit au Roy d'Espagne, que ie luy ay fait voir, & que d'ailleurs l'on le iuge clairement par leurs actions, n'estant point croyable qu'ils se voulussent mettre entre les bras du Roy d'Espagne, & luy bailler des villes, ou plustost des fleurōs

de la Couronne de France, cōme Monsieur de Mercure a fait Blauiet, port de mer tres-bon en la Bretagne, & Monsieur de Mayenne la Fere en Picardie, & voulu faire d'autres en ladicte Prouince: comme l'on a dict & permis que Monsieur le Duc de Parme vint commander en France, & le fit arrester en son antichambre fort long temps avec les autres Gentils-hommes, auant que de luy permettre d'entrer en sa chambre, & quelquesfois le renuoyer sans vouloir parler à luy, en luy faisant dire par l'un de ses Cameriers, que sō Altesse estoit vn peu empeschée: car à la verité tels traits sont fort preiudiciables à l'auctorité que Monsieur de Mayenne se donne de lieutenance generale de l'Estat & Couronne de France, parcé qu'il semble qu'il deuoit commander à l'armee Espagnole estant entree en France, puis que Monsieur le Duc de Parme n'estoit pas de plus grande maison que celle de Lorraine, ny ayant de son roy plus grande charge que ledict sieur Duc de Mayenne pretendoit d'auoir. Parquoy vostre saincteté peut cognoistre, que s'il a enduré telles indignitez si difficiles à vn cœur genereux de souffrir, il l'a fait en son corps

deffendant, & malgré luy, se voyant reduict à telle extremité, ou de les endurer, ou biē de se voir terrasser par nostre Roy.

Et pource que telle foiblesse est par trop cogneuē à ceux qui veulent tenir les yeux ouuerts, l'on a pensé de la fortifier par des rodomontades que l'on a publié, disant, que si l'on auoit vne fois esleu vn Roy, & accompagné d'une bonne & forte armee, qu'en peu nostre Roy seroit accablé, & tāt de bons François qui le suiuent, & l'autre estably en possession paisible du Royaume. Ce qui m'a donné occasion de faire entendre à vostre Sainteté que tant s'en faut que cela puisse estre, qu'il ne seruira que de ruiner vne grande quantité du miserable peuple Catholique & innocent, & vne infinité de beaux monasteres, & apporter du desordre tres-grand en la discipline Ecclesiastique. Car, en premier lieu il ne se peut iustement eslire vn Roy de race estrāgere, au preiudice des Princes du sang, vrais heritiers & successeurs de la couronne, ainsi que le reste du Parlement demeuré à Paris l'a faict cognoistre, ayant interpreté ce mot d'*eslection*, contennu au pouuoir donné par vostre Sainteté à Monsieur

le Cardinal de Plaisance, à declarer vn Roy Catholique : & depuis par autre arrest du xxviij. Iuin dernier, donné sur la pretendue eslection de la Signora Infante, & de Monsieur l'Archiduc Erneſte, & puis de Monsieur de Guise *in ſolidum*, marié avec ladiète Signora Infante, propoſee par le Duc de Feria, & fauoriſee par Monsieur le Cardinal de Plaisance au nom de voſtre Saincteté: il a eſté ordonné par lediēt Parlement qu'il ne ſeroit point eſleu de Prince eſtranger, & que la loy Salique ſeroit gardee, ayāt faiēt paroistre par ſes deux arreſts qu'il n'eſtoit loiſible de proceder à aucune eſlection, & moins en la perſonne d'un Prince ou Princeſſe eſtrangers, auquel mot ſont compris de tout temps les Princes ſortis des maiſons eſtrangeres, bien qu'ils ſoient habituez en France, & faiēts regnicoles.

D'autre coſté, quand bien l'on voudroit proceder à telle eſlection, il conuiendrait aſſembler les eſtats generaux de tout le Royaume: ce qu'ils ne peuuent faire, tenant le Roy (comme i'ay diēt) en ſon obeiſſance, les deux tiers d'iceluy, ainſi qu'il s'eſt peu cognoiſtre en l'aſſemblee de leurs pretendus eſtats, qui s'eſt faiēte en la ville de Paris

l'annee derniere 1593. ne s'y estant trouué la moitié des deputez qui sōt coustumiers de se trouuer aux estats generaux conuoquez par les Rois, comme i'offris iustifier à vostre Sainteté: qui fait bien paroistre la foiblesse de ceux de la ligue, & l'inualidité desdicts pretendus estats. En outre ie diray que ores que l'ō ne voulust laisser pour cela de conuoquer telle quantité de deputez que l'on pourroit ramasser, telle conuocation ne se peut vallablement faire, parce qu'il n'appartient qu'au Roy seul de cōuoquer les Estats, & en defaut de luy, au Regent, qui est ordinairement le premier Prince du sang capable de gouverner, lors que le Roy est prisonnier ou absent, & les enfans mineurs, lequel avec l'aduis des autres Princes du sang, Pairs & Officiers de la couronne conuoquēt les Estats, & pouruoient aux affaires & gouvernement du Royaume.

Or tant s'en faut que personne du costé de la ligue aye tel pouuoir, qu'ils n'ont aucun Prince du sang de leur costé, ny Officiers de la Couronne, pourueuz par les Rois noz predecesseurs (chose à noter) qu'aussi parce que l'authorité que Mon-

sieur de Mayenne s'est peu à peu vſurpee, n'est aucunement bonne, ny ne ſe peut eſgaler à celle d'un Regēt, & par conſequent ne peut conuoquer les Eſtats generaux. Et qu'ainſi ne ſoit, le pouuoir que ledict Sieur de Mayenne a, ne prouient que de cinquante quatre perſonnes, la pluſpart tres-indignes, qui le luy donnerent le 4. Mars 1589. apres qu'il les eut luy-meſme choiſis le xix. de Feurier 1589. & creez Conſeillers du Conſeil general de l'vnion, ores qu'il recogneut que la pluſpart fuſſent tres-ignorans d'affaires d'Eſtat, parce qu'il les auoit ſeulement pris dans la ville de Paris, & non des prouinces de la France, & triez grande partie parmy des marchands, Banquiers, Procureurs, Curez, Theologiēs de la Sorbonne, & autres de ſēblable eſtoffe, pour eſtre gens fort factieux & propres à eſſectuer ſon intentiō: ſur la preud'homme deſquels il y a tant à redire, que ſi ie ne craignois d'ennuyer voſtre Sainctetē, ie la rendrois du tout eſmerueillee; & me ſuffira ſeulement de luy dire, qu'en fin ledict ſieur de Mayenne le fit tres-ſagement apparoir, quand luy-meſme les caſſa tout en vn coup, & foula aux pieds comme des

potirons, au mois de Nouembre ensuiuant, apres qu'il en eut tiré ce qu'il en vouloit, à cause de l'ignorance tresgrande, accompagnée d'une outrecuidance malicieuse qu'il recogneut en leur esprit, & soudain refit vn autre conseil de gens plus capables à manier affaires d'Estat. Voila, Pere Sainct, la vraye origine du pouuoir de Monsieur de Mayenne. Et quant à l'autorité, elle ne luy fut donnée par lesdicts cinquante quatre, que pour commander seulement aux armées de la ligue, & encores en attendant ce qui seroit ordonné par leurs estats generaux, que deslors ils auoient proposé de tenir bien tost : Ce que neantmoins n'a iamais esté fait qu'en l'annee derniere, & encores à toute force, ausquels toutesfois il n'en a point esté parlé, qui descouure bien amplement les collusions qui sont parmy eux.

Si l'on dit que le Parlement de Paris a verifié ledit pouuoir, ie diray qu'il est vray, & que ce fut trois iours apres qu'il fut donné par les susdicts cinquante quatre potirons, & lors que le Parlement n'estoit plus Parlement, ains seulement l'idée d'iceluy, pour n'y estre que gēs assemblez pour exé-

cuter les frenesies des seditièux : car il n'estoit demeuré audiect Parlement, que ceux qui estoient iuges & parties, & quelques autres si fort estonnez & intimidez, qu'ils n'osoient rien dire, pour crainte d'estre mis prisonniers dans la Bastille & le Louure, par vn nommé le Clerc, simple Procureur dudit Parlement, comme il auoit fait le xvj. Ianuier precedant, assisté d'un grand nombre de factieux, plusieurs des Presidents & Conseillers dudit Parlement. Et en tout cas que ladiecte verification ne luy donnoit plus d'auctorité qu'il estoit déclaré au pouuoir des cinquante quatre susdits, l'ayant limité seulement pour les armées, & iusques à ce qu'il seroit autrement ordonné par lesdicts estats generaux, lesquels ayans esté tenus, sans qu'il en ait esté rien parlé, s'ensuit qu'il n'est bon & valable, & partant qu'il en a abusé en la conuocation qu'il a faicte desdicts estats, & en plusieurs ordonnances, mesmes en dons, confiscations des Seigneuries & Duchez, entre lesquelles la mienne du Rethellois y est, laquelle il luy a pleu dés le xxj. iour de Feurier 1591. vsant d'une tres-grande liberalité, de donner à Saint Paul, le pere duquel

quel n'auoit qu'une meschâte maison pres la Ferté Gaucher en Brie, la pluspart couuerte de chaume, & deux de ses sœurs, l'une mariee à vn laboureur, & l'autre à vn pauvre tixerrand pres de Naugy en Brie. De mesme il a fait d'autres terres, que j'ay en Picardie, & de plusieurs autres Seigneuries appartenans à diuers Princes, & personnages d'honneur. Il a aussi donné plusieurs gouuernemens de Prouinces, & entre autres celuy de Dauphiné du viuât de Monsieur de Montpensier, auquel le feu Roy l'auoit donné. De mesme il a faict des estats & offices de la Couronne, combien qu'ils ne soient vacans, & ayent esté donnez quasi tous par le feu Roy auparauant ces dernieres seditions, à Princes & Seigneurs Catholiques, & de grande qualité & merite, pretendâs qu'ils fussent (cōme il declaroit) vacans par felonnie, pour n'auoir voulu ceux qui les tiennent, l'aller seruir. Ce que j'ay tousiours offert à vostre Sainteté de faire apparoir par pieces autentiques, que j'ay apportees avec moy, ne pretendant de mettre en auant chose, que ie ne puisse prouuer, pour oster l'occasion, que l'on ne die de moy avec verité,

ce que l'on dit qu'un Philoſophe eſcrit de Moyle, *Multa dixit, & nihil probavit.*

Il eſt donc bien aisé de iuger. que ce pouuoir donné ſeulement par gés incapables d'auctorité & de ſçauoir, n'eſt tel, que celui d'un regent: d'ot ſ'enſuit, que ce qu'il a par cy deuant faiât, appartenant à un Regent, & qu'il pourra cy apres faire, meſmes pour ladite conuocation des trois eſtats, n'eſt, & ne ſera valable, & qu'il ne doit eſtre tenu pour bon aucune choſe, qu'il ait faiâte, ſinon les exploicts de guerre, qu'il a faits contre la propre perſonne de nos Roys, comme la belle entrepriſe de Tours & les beaux & grands cōbats enſuiuis autour de Paris, lors que le feu Roy le vint aſſieger, l'eſcarmouche d'Arques pres Dieppe, la bataille d'Yury, le ſecours qu'il a donné aux fauxbourgs de Paris biē fortifiez, & à pluſieurs villes autour de ladite ville, & au pays de la Beauſſe, du Mans, du Perche, de Normandie, & finalement à Dreux, que noſtre Roy a aſſailis & pris: Enquoy ledit ſieur de Mayenne peut eſtre excuſé en partie, s'il n'a faiât ce qu'il deſiroit, parce qu'il n'auoit le pouuoir bon & vallable, pour faire

la guerre contre les Rois ses souuerains.

Vostre S^{ae} peut par là cognoistre, que le-
dit sieur de Mayenne, & les siens pour luy,
ont abusé vostre S^{ae} à luy nommer les per-
sonnes aux benefices de la France, com-
me s'il auoit ce droict, qui n'appartient
qu'au Roy en vertu du concordat faict &
gardé seulement entre vos predecesseurs
Papes, & les Rois de France: dequoy i'ay
estimé deuoir aduertir vostre S^{ae}, & me
descharger par tel aduertissement de ce
qui en pourra aduenir cy apres, au cas que
vostre S^{ae} continue à les bailler, non seu-
lement à sa nomination, mais par sa recô-
mandation. I'estime Pere S^r, auoir claire-
ment faict cognoistre à vostre S^{ae} que la-
dicte conuocation d'Estats ne se peut au-
tentiquement faire par ledict sieur de
Mayenne, au preiudice des loix & statuts
de tout temps obseruez au Royaume de
la France, qui y sont formellement con-
traires, & consequemment que l'esle-
ction, qui se feroit d'un Roy nouveau
par telles personnes assemblees sans legi-
time pouuoir, & contre les formes ordi-
naires gardees & obseruees en tel cas &
en si petit nombre, ne seroit bonne, ny

vallable, mesme estant faicte d'un Prince estranger, au preiudice des Princes du sang royal, vrais heritiers de ladite couronne, & contre les arrests de leur Parlement.

Neantmoins posé le cas qu'elle se peust faire, ie pense auoir faict cognoistre à vostre S^{ae} qu'elle ne seruiroit de rien, & qu'ores qu'on eslise pour Roy Monsieur de Guise, ou Monsieur de Mayenne, ou tel autre, que l'on voudra, que ceste eslection ne luy donnera plus d'argent, & de moyen, qu'il en a de s'entretenir, & se cōseruer, & de chasser nostre Roy: ains ie dis, qu'elle luy augmentera la despence, qu'il luy conuiendra faire pour entretenir honorablement l'auctorité & la profopopee royale: De sorte qu'il faut dire que ceste eslection apportera à ce nouveau Roy Bertaut ou Regulus plus d'incommodité, que de profit, & conclure que l'on aura esleu non un Roy, ains un fantosme, pour estre porté deuant l'armee Espagnole, pour penser d'assubiectir la France aux Espagnols, au preiudice de la grande liberté que les François ont eu de tout temps sous leurs legitimes Rois, & en fin que venant le Roy d'Espagne à mourir, comme il peut

faire, estant aagé de lxxij. ans passez, & fort valetudinaire, l'on pourra par mesme moyen enterrer ledict Roy Bertault, qui fera la fin de la cruelle tragedie, qui se iouëra en France pour quelque temps, puis que vostre S^{te} trouue bon d'y laisser continuer les guerres ciuiles, sans y donner ordre. Car l'on doit croire, que les vrais & bons François ne permettront iamais d'estre reduits sous les Princes estrangers, ains qu'en fin ils feront comme leurs predecesseurs ont fait sous Charles VII. pour s'estre par trop legerement donnez en la subiection des Roys d'Angleterre, desquels ils se deliurerent en moindre temps, qu'ils s'y estoient donnez, & retournerent sous l'auctorité & liberté de leur Roy naturel.

Et parce que l'on craignoit, que telle election ne fust recogneuë impertinente, l'on a mis en auant, que ledict Roy d'Espagne accompagneroit ledict Roy esleu d'une armee de vingt mil hommes, laquelle chasseroit le nostre en trois iours: Mais vostre S^{te} se souuiendra, s'il luy plaist, que ie luy ay dict, que non seulement i'accordoys, qu'il eust lesdicts vingts

mil hommes, mais trête mil, parce qu'aussi peu il seroit en son pouuoir avec telles forces de terrasser & de chasser nostre Roy : ains au contraire, que tant plus de soldats il auroit, plus il en perdrait, & feroit plus de despence inutile, comme tous Capitaines pour peu experimentez qu'ils soient, le iugeront ainsi, sçachans, qu'il n'est au pouuoir d'un general d'armee de donner la bataille à l'autre general, s'il ne l'a agreable. Ce qui aduientra maintenant : car si nostre Roy ne iuge luy estre expedient de la donner, pour ne hazarder son estat tout en vn coup, il se logera en assiette tres-aduantageuse, & & quand bon luy semblera, il mettra vne riuere non gayable entre son armee & celle de ses ennemis, qui les empeschera de le combattre contre son gré; voire les contraindra de s'en aller possible attaquer quelque forteresse, à laquelle sa Majesté s'approchant cinq ou six lieues en assiette forte, les contraindra de rechef de leuer le siege, à cause de plusieurs incommoditez, qu'il leur fera receuoir : de sorte, que ne pouuant lesdicts ennemys non plus forcer aucune ville, seront fina-

blement reduicts à aller quelques mois vagans par le plat pays, ruynans le miserable & innocent païsant Catholique, comme ils font, & destruisans les beaux & deuotieux monasteres qui sont à la campagne, & quant & quāt aneantir leur armee, tant par la faute des viures, que d'autres necessitez, que la saison apporte, & puis se retirer en Flandres pour la quatriesme fois, bien-heureux encores, s'ils ne seront battus, comme ils l'ont cuidé estre par deux fois.

Par là donc il se peut assez cognoistre, qu'il n'est au pouuoir du Roy d'Espagne, bien qu'il vescuſt encores cinquante ans, de terrasser & chasser nostre Roy, ains seulement d'embraſer de plus en plus nostre France, & apporter vn desreiglement incroyable à tous les gens d'Eglise, & vne ruine extreme au peuple, & non pas à vn seul huguenot, comme les Ambassadeurs de sa majesté catholique l'ont promis, sans pouuoir de leur maistre (comme ie cuide) parce qu'il cognoist fort bien, que telle entreprise ne se peut effectuer: Et me semble ne deuoir croire, que sadite Majesté estant reduite à l'extremité de savié, soit possedee

d'une si grande ambition terrienne & vaine, qu'il vueille perdre la gloire celeste & eternelle, se faisant ministre de tant d'impietez & cruautez, pour penser d'acquérir la Monarchie Chrestienne en si peu de tēps, qu'il a à viure: Au contraire de ce que tres-sagement fit l'Empereur Charles son pere, qui mesprisant son Empire se retira du monde plusieurs annees deuant sa mort, pour ne vacquer qu'à prier Dieu, & à faire le salut de son ame. Parquoy ie suis contrainct de dire, que recognoissant ledict Roy pour l'un des plus sages de nostre siecle, pour auoir fait paroistre sa generosité en plusieurs belles occasions, qu'il ne peut maintenāt, qu'il est sur le bord de sa fosse, penser à vsurper la Couronne de France, cōme le sieur Duc de Feria l'escriit au Duc de l'Infantado son pere, par la lettre du viij. Apiril dernier, que i'ay fait voir à vostre S^{te}, ains que ce sont ses ministres qui ont telle ambition effrene, lesquels taschent d'abuser ceux de la ligue, comme d'autres ministres Espagnols ont voulu cy deuant faire des principaux de nostre Royaume.

I'eusse esté bien aise, Pere S^t, que Mon-

sieur le Cardinal de Plaisance, auquel aués
donné vostre legation pour assister à ladi-
te eslection, qui cognoist fort bien les af-
faires de la France, autant que nul autre,
pour auoir esté bon tesmoin oculaire de-
puis quatre ans en ça des euuenemens, qui
y sont suruenus, vous eust aduertý, qu'il e-
stoit du tout impossible (comme il le sçait
bien) de chasser nostre Roy par l'eslection
d'un autre nouveau, & avec vne armee, o-
res qu'elle fust formidable, & qu'il vous
eust ouuert quelque bon expedient, pour
vous donner le moyé d'appliquer le reme-
de salutaire aux miseres de ce Royaume
conformement à vostre intentiõ, afin d'e-
uiter les maux, qui ont esté faicts, & ceux
qui aduiendront, du tout contraires à vo-
stre naturel, & au deuoir du Pere commün
des Chrestiens, & non pas faire le contrai-
re, comme il s'est cogneu auoir faict par
les lettres qu'il a escrites ce mois d'Aoust
dernier à Monsieur vostre Nonce en Es-
pagne, criant incessamment *fuoco fuoco*,
comme s'il vouloit embraser la France, &
la ruiner tout en vn coup par la rage des
soldats : Et par autres lettres precedentes
il a pressé vostre Sa^{te}, que l'on esleust la si-



gnora Infante, ou vn prince estrange, & que l'on eust à exclure les Princes du sang Royal de la succession de la Couronne, & que l'on excommuniast tant de bōs Princes, Prelats, & Seigneurs tous Catholiques, qui assistēt nostre Roy, sans vous faire entendre, Pere S^r (comme il le sçait bié) qu'ils le suiuent pour conseruer la religion Catholique, & empescher, que la diuision de la Couronne ne se face conforme à vostre desir, & non pas pour agrandir l'heresie: mais la craincte de desplaire aux Espagnols, & à ceux qui tendent à ruiner la France, l'a retenu de le vous mander, & aussi peu que ceux de la ligue, tāt les chefs, que autres, sont excommuniez par les simonies, sacrileges, & prise des armes iniuste, qu'ils ont faicte, afin que vostre S^{ae} les recogneust pour tels qu'ils sont, & non pas pour Anges du Ciel.

Outre tout ce que i'ay dit cy dessus pour faire paroistre la foiblesse de ceux de la ligue, il me semble, que ie dois encores représenter à vostre S^{ae}, que l'ordinaire des ligue est de se deslier, & ne durer longuement, cōme l'experiēce en fait ample foy, & qu'il s'est veu en celle derniere cōcluë par

le S^t Pere Pie cinquiésme contre le Turc:
& partant que celle-cy, qui est si mal fon-
dee, ne se peut maintenir, & d'autât moins,
estant la diuision & deffiance si grâde par-
my eux, qu'elle les empesche de s'accorder
ensemble, sinon à dissiper la Couronne, &
en prédre chacun vne partie, & en fin à v-
surper & raurir l'vn sur l'autre les places,
qu'ils tiennēt, & d'affuiećtir en leur parti-
culier pouuoir les meilleures villes de la
France, bien qu'elles soient leurs cōfede-
rees, cuidans en demeurer cy apres sei-
gneurs propriétaires, ou plustost tyrás, cō-
me l'experiēce s'en est veüe, & se void tous
les iours, sans auoir ésgard, que telles bon-
nes villes se sont presque destruites, pour
exalter leurs chefs: vray est que telle tyrā-
nie a commēcé à faire ouurir les yeux aux
bons & sages habitans desdites villes, afin
d'euitier d'y tomber, pour auoir esté touf-
iours maintenus libres du temps de nos
Rois avec leurs priuileges.

Monfieur de Mayenne n'a iamais voulu
rendre à Monfieur de Nemours la ville de
Seurre sur Saonne en Bourgongne, parce
qu'elle est tresforte, dont est aduenu la di-
uision parmy eux, & telle qu'il n'a voulu

aller à Lyon, quelques larmes que Madame leur mere cōmune ait iettees, pour deliurer de captiuité Monsieur de Nemours son frere, miserablement detenu par ceux, qu'il vouloit aussuiectir à luy : esperant ledit sieur de Mayēne par la captiuité de son frere s'auctoriser en retirant de ses mains les places qu'il a aussi vsurpees sur autrui, & ce afin de se faire rechercher, & favoriser par le Roy d'Espagne, & par vostre S^{ae}, en la pretendüe eslection de Roy.

Ledit sieur de Nemours a aussi chassé Monsieur le Marquis Dursé de la ville de Montbrison, & icelle appropriée à luy: De mesme il s'est emparé de la ville de Brioude en Auuergne, de laquelle M^osieur Dādelot estoit gouuerneur, le mettant en la mesme prison, en laquelle il est detenu, & ce combien que tous deux courussent aupres de luy la mesme fortune: de mesme il a desiré de faire de la ville & chasteau d'Aussonne, & de celle de Mascon, tenant le party de Monsieur de Mayenne: Monsieur le Baron de Thenissé a fait de mesme de la ville de Chastillon sur Seine: Sainct Paul a fait de mesme sur aucunes, & rasche tous les iours d'en faire le sem-

blable sur d'autres. Et ainsi plusieurs de la ligue ont faict, & taschent de faire, parce que c'est chose introduicte & pratiquee parmy eux n'ayans aucun Roy, & ne pretendans d'en auoir: Au contraire lon ne void point, que les Catholiques Royaux vsurpent des villes, comme les ligueurs font: car leur but ne tend, qu'à les conseruer à la Couronne de France sous l'auctorité de leur Roy, & pource prennent en bonne part tout le mal qu'ils souffrent & endurent par telle guerre, pour l'esperance seule, qu'ils ont de laisser vne heureuse & louable memoire à iamais à leur posterité, d'auoir empesché les deserteurs de leur patrie, à effectuer vn si pernicieux desir.

Et parce que vostre S^{ae} m'a declaré, qu'elle se trouuoit obligee à supporter ceux de la ligue, pour auoir tousiours soutenu la Religion Catholique, & donné occasion de croire, qu'elle les tient pour les vrais enfans: & nous autres pour ceux de la seruante, & que leurs actions fussent saintes & bonnes, & les nostres tres-mauuaises & iniques: i'ay estimé de uoir représenter à vostre Saincteté, ce que que ie luy ay dict sur ce sujet particu-

lièrement en ma dernière audience du deuxiesme de ce mois de Ianuier, pour luy donner iuste occasion d'auoir meilleure opinion, qu'elle n'a de nous tous. Et pour ce faire ie la suppliay tres-humblement, de prendre l'origine de ceste dernière esmotion faicte par ceux de la ligue dès le mois de Ianuier 1589. du viuant du feu Roy, auquel temps ils s'efforcerent de le degrader, & le tenans pour tel, commencerent à distribuer les charges principales du Royaume, & prindrent les armes, non contre les huguenots (parce que leur but ne tendoit de ce costé-là,) comme ils l'ont bien faict paroistre, n'en ayant tué dix de marque, mais contre leur Roy souuerain tres-Chrestien & tres-Catholique, comme ses actions l'ont tesmoigné, & le tesmoigneront à iamais, & duquel ils auoiēt eu tous les honneurs & charges qu'ils tenoient avec plusieurs bien-faicts, & qui plus est sans aucune auctorité vallable, & contre les loix diuines & humaines, & au cōtraire du reproche, que les predicateurs ont tousiours fait aux huguenots, lors que ils s'estoiēt armez cōtre nos Rois: dequoy sont ensuiuis à l'Eglise de Dieu, & au mise-

nable peuple Catholique tât de ruines, miseres, meurtres, & sacrileges, que l'on a veu depuis cinq ans en ça. Ce qui ne fust aduenu, s'ils n'eussent pris les armes contre leur Roy, ou bien qu'ils se fussent seulement adressé aux provinces de Dauphiné, & de Poictou, où estoient les huguenots, pour faire paroistre le zele Chrestien qu'ils publioient auoir en leur cœur. Car les Catholiques estoient fort à leur aise, & l'eussent encores esté d'auantage, & non point tourmentez & ruinez, comme ils sont, parce que la guerre, que le feu Roy faisoit en Poictou, eust esté continuee, & y fust luy mesme allé en personne, comme il me le promit, lors qu'il me donna la charge de son armee en ladite Prouince, avec laquelle ie pense auoir fait mon deuoir autant, pour ne dire plus, que Monsieur de Mayenne l'a faict en mesme temps en Dauphiné, où il auoit pareille charge & commandement, dont i'estime meriter pour le moins autant de louange, que luy.

Cela donc, Pere S', vous peut faire connoistre, que l'origine de ceste prise des armes ne prouient de zele de Religion, que ceux de la ligue eussent dans le cœur,

puis qu'ils se sont armez, nō contre les huguenots, mais contre leur Roy, nonobstā qu'ils fussent bien informez par les reproches, qu'autrefois leurs predicateurs ont faict aux huguenots, qu'il n'appartenoit aucunement aux suiects de prendre les armes de leur auctorité priuee contre leur Prince souuerain. D'ailleurs le meurtre inhumain commis en la personne de leur Roy, suiuy d'une ioye incroyable, qu'ils ont declaree de sa mort, a tesmoigné assez l'interieur de leur cœur, & si le premier mouuement de leurs actions estoit sainct, aussi le retardement de dix mois mis à declarer aucun Roy du sang Royal, depuis qu'ils eurent ignominieusement & toutesfois imaginaiement degradé le feu Roy viuant en Ianuier & Feurier 1589. tesmoigne ce qu'ils vouloiēt faire de la Couronne : car ils ne declarerent pour Roy feu Monsieur le Cardinal de Bourbon prisonnier, qu'en Nouembre ensuiuant, apres qu'ils se virent deboutez de l'esperāce d'attirer la courōne sur la teste de celuy, qu'ils desiroient par la prise, que le Roy de present fit des fauxbourgs de Paris fortifiez, & cuidé prendre la ville, & diray encores, qu'ils

qu'ils declarent lors ce Prince pour leur Roy à regret, parce que ce mot de Roy leur est fort odieux en la personne des Princes du sang, comme ils firēt apparoir apres le decez de mondiēt sieur le Cardinal, qui aduint le ix. May 1590. dautāt que depuis ils n'ont faiēt semblant de vouloir eslire autre Roy de la maison du sang royal, se repentans d'auoir declaré feu mondiēt sieur le Cardinal, parce qu'ils recogneurent par tel acte auoir tacitement aduoué lediēt sang royal de Bourbō heritier de la Couronne: Et dauantage pensans assoupir & estouffer au plustost qu'il leur seroit possible le nom & la memoire de ce bō Prince recogneu par eux pour Roy, ils ne luy ont iamais voulu faire aucunes funerailles, ny seruices, ny mesmes porté le dueil de sa mort: ains ie diray à vostre S^{ae} chose veritable & pitoyable, qu'ayant Mademoiselle de Guise petite niepce de feu mondiēt sieur le Cardinal, pris le dueil par le commandement de Madame de Guise sa mere, Monsieur de Mayenne le luy fit oster neuf iours apres qu'elle l'eut pris, qui tesmoigne la souuenance, qu'ils gardent de ce bon Prince, qui s'estoit ruiné pour

les exalter, recompense certes tresmiserable & accoustumee parmy eux, ne tendans qu'à faire leurs proffit particulier. Et qu'ainsi ne soit, il se voit tous les iours que les principaux chefs de la ligue ne laissent de recognoistre nostre Roy, quand ils ont besoin d'auoir de luy la mainleuee de leurs biens, & des sauuegardes & exemptions de leurs terres & iuiects, comme des passeports pour leurs gens, qu'ils enuoyent pour leurs affaires domestiques, ne se desdaignans d'en supplier sa Majesté, quand ils en ont besoin: Au cōtraire ils taschent d'vsurper tout ce qu'ils peuvent du Roy & de ceux qui le seruent, comme i'ay dit cy deuant. X

D'ailleurs vostre S^{te} n'a elle pas recogneu assez amplement l'intétion de ceux de la ligue, & de leurs alliez, quand elle a veu, que les Ministres du Royd'Espagne ont recherché de faire eslire pour Roynce de Frâce la Signora Infante, fille aisnee du Roy leur maistre, & en son default Monsieur l'Archiduc Erneste son cousin, pourchassant de faire exclure les Princes du sãg Royal de la France? De mesme que monsieur de Guise a poursuiuy d'estre esleu

pour Roy, & Monsieur de Mayenne encores plus que luy, pour l'auoir deboutté de telle eslection, ores qu'il fust fils de son aîné. Monsieur de Nemours a tesmoigné son desir par les memoires qu'il bailla au Baron de Thenissé, pour presenter à Monsieur de Mayenne, afin d'estre preferé à tous apres luy. Finablement Monsieur de Lorraine a aussi faict cognoistre son but, comme estant le chef de la maison de Lorraine & de Guise, mesme par le fait de Strasbourg, duquel ie ne parleray point, puis que vostre Sainteté m'a tesmoigné d'en estre bien amplement informee, & faschee, qu'il ait fait la paix avec les protestans, diuisé & party l'Euesché de ladite ville, que le sainct siege auoit donné à Monsieur le Cardinal son fils, pour le garder & conseruer. Et diray seulement à vostre Sainteté, que s'il plaist à Monsieur de Lorraine d'accepter la paix en France, qui luy a tousiours esté offerte fort honorablement, pour luy, il recourra en vn coup tout ce qu'il a perdu de son patrimoine, moyennant qu'il rende ce qu'il tiét de la France? voire ie croy, que l'õ luy pourra laisser quelque place en ses mains, cõme

l'on luy a cy deuant offert, & en ce faisant Monsieur de Bouillon, ny autre de la part du Roy, ne luy feront aucunemēt la guerre. Monsieur de Sauoye aussi de son costé a prétendu auoir la Prouēce, & quelque part au Dauphiné. Monsieur de Mercure prétēd, que la Bretagne luy appartient du chef de Madame sa femme. D'ailleurs plusieurs Seigneurs pretendent de iouir en propre des villes, qu'ils ont en gouuernement: de sorte qu'il se peut dire, qu'ils ont diuisé en leur fantasie ceste grande Courōne royale, cōme si desia elle estoit tombee par terre, & brisee en mille pieces. Mais le Dieu viuant, qui l'a conseruee iusques à present, la deffendra, s'il luy plaist, & destournera tels pernicieux desseins, & nous aydera à nous y opposer, & empescher, cōme auōs faict tous ceux, qui se sont eleuez contre nos Rois, d'effectuer leurs pernicieux desseins. Car nostre but & ambition n'a iamais esté autre, que de les assister à soustenir la religion Catholique, & la Couronne, & à deffendre leur propre personne en toutes les emotions de guerre cy deuant faictes, dont plusieurs rapportent les marques signalees sur leurs corps, pour re-

compense de l'honneur, qu'ils ont acquis, ce que ceux de la ligue ne peuuent se vanter d'auoir tousiours faict.

D'autre costé nous nous pouuons aussi vanter d'auoir aydé à la conuersion de nostre Roy, & à le ramener à l'Eglise, ce que ceux de la ligue avec toutes les forces estrangeres, qu'ils ont introduict dás le Royau-me, n'ot eu le pouuoir de faire : Aussi il est aisé à croire, qu'ils n'ont iamais eu la volonté, pour ne perdre le pretexte de religion, qui leur a seruy de faire, ce qu'ils ont faict, & font tous les iours.

L'on a voulu dire, que les Catholiques royaux deuoient apres la mort du feu Roy aller rechercher ceux de la ligue, pour eslire vn Roy Catholique plustost, que de suivre cestuy-cy, qui lors ne l'estoit. A quoy ie respondray, que si le feu Roy n'eust esté meschamment tué, l'on ne fust tombé en ceste action. D'auantage, que ce n'estoit aucunement chose iuste & raisonnable, que tant de Princes du sang Royal, & autres Princes, avec les Officiers de la Couronne, & tant de braues Seigneurs, Gentilshommes, Capitaines & soldats allassent rechercher ceux, d'entre lesquels estoit

forty le meurtrier de leur Roy, lequel ils auoiēt presque canonisé, & voulu esleuer son effigie sur vn pilier de marbre dās l'Eglise de Paris, faict chanter le *Te Deum*, tirer l'artillerie, faict plusieurs feux de ioye de la mort de sa Majesté, comme si desia la Couronne estoit tōbee par terre, & qu'elle fust saultee sur leurs testes, & par telle recherche souiller leur honneur, & se rēdre consentans de tels actes si contraires à leurs intentions, & au deuoir des bōs subiects, & seruiteurs fideles, qui doiuent rechercher la iuste vengeance de la mort de leur feu Roy & maistre.

✓ Pareillemēt ie diray, qu'il n'eust esté aucunement raisonnable, que tant de Princes du sang royal, & autres Princes, & tant de personnages de qualité fussent allez s'assuiection à Monsieur de Mayenne, l'vn des cadets de la maison de Lorraine, qui n'auoit autre pouuoir, que celuy chetif, qui a este dit cy dessus des cinquante quatre, apres que l'onzième Aoust ensuiuant ledict assassinat il eust faict l'Edict, par lequel il cōmandoit à chacū de s'aller ioindre à luy sur peine de confiscation de leurs biens, promettāt neantmoins impu-

nité à ceux qui iroient le trouuer, comme si desia il luy fust permis de nous commander, & maistriser en Roy, disant, *Sic volo, sic iubeo, sic mea voluntas est*, & nous traicter comme ses propres suiects & seruiteurs. Quel honneur eussions nous eu, ou plustost quel blasme aurions nous acquis, & quel aiguillon eussions nous fiché dans noz cœurs, si nous eussions faict vn seul petit acte d'approuuer le parricide commis si fraischement en la personne de nostre roy tres-Chrestie & bõ maistre, ores qui fust mort, & de desirer la diuision & ruine de la Couronne de la France, au lieu de la soustenir, & deffendre, comme auons tousiours faict contre ceux, qui l'ont voulu dissiper, & rendre subiecte aux estrangers, desirans de laisser à nostre posterité vne heureuse memoire d'auoir esté les vrais & bons enfans de nostre patrie? A la verité i'estime que tout hõme d'hõneur ne nous eust iamais donné conseil de faire tel acte, si contraire à nostre deuoir, & à l'obligation que nous auions à nostre bon Roy & maistre, & à l'auëtorité de Messieurs les Princes du sang royal, qui sont bien d'autre qualité, que ceux de la ligue: ains au contraire ie

veux croire, qu'ils nous louèrent grandement de nous estre comporrez de telle façon, & diront, que nous pouuions faire autrement de ce qu'auons faict, sans souiller nostre honneur, & entacher celuy de nostre posterité.

Vostre Saincteté iuge donc, s'il luy plaist, si auons eu occasion de nous atter ioindre avec telles personnes, si peu affectionnez au sang Royal de nos Roys, & si peu songneux du bien de la Couronne, & soulagement de nostre patrie, & peuple d'icelle, comme chacun a veu, & voit, & à entretenir la reigle & discipline Ecclesiastique. Si nous eussions eu, & auons l'ambition telle, qu'il ont, nous nous fussions allez ranger soubz l'estendart de la croix rouge, qu'ils portent deuant eux, pour auoir nostre part des fragmens d'icelles: mais parce que nous auons esté tousiours eslongnez d'un tel desir, si pernicieux, & contraire au deuoir des bons François, & d'ailleurs resolu, cōme nous le sōmes encōres, de soustenir la Courōne Royale iusques à la derniere goutte de nostre sang, & d'euter, tant qu'il nous sera possible, d'estre entachez & blasmez d'auoir esté

proditeurs de nostre patrie, & d'auoir des-
chiré les propres entrailles de nostre me-
re, dans lesquelles elle nous a si cherement
nourris & esleuez, il n'a iamais peu entrer
en nostre esprit de faire vn acte si barbare
& inhumain, recogneu pour tel par toutes
les nations belliqueuses & valeureuses, qui
nous ont si sagement enseigné de l'euer,
pour auoir eu en horreur les parricides.
D'auantage nous sommes grandement te-
nus & obligez à soustenir la Couronne, par
le serment, que nous y auons : Et d'autant
plus maintenant que Dieu a exaucé noz
prieres & larmes, pour auoir ramené no-
stre Roy en son Eglise. Car à bonne & iuste
cause nous serions blasmez, si maintenant
nous l'abandonnions entre les mains de
ses cruels ennemis, apres s'estre ietté entre
les bras de nostre mere sainte Eglise Ca-
tholique, pour no^s aller ioindre avec ceux
de la ligue. D'ailleurs comment eussions
nous peu regarder de bon œil ledict sieur
Cardinal de Plaisance, si fort enflammé cō-
tre le sang royal de noz Rois, & nous tous
catholiques, pour nous exterminer en noz
propres corps & biens, & pareillement en
nostre honneur, pour exalter les Princes

estrangers, & introduire les Espagnols à la domination de la France?

I'ay estimé, Pere Sainct, tres-necessaire de representer de rechef à vostre Saincteté ce propos, pour l'esclaircir des actions de ceux de la ligue, & quant & quant des nostres, & luy faire cognoistre, qu'ils ne sont pas les vrais pilliers de la Religion Catholique, & de la Couronne, & nous les deserteurs de l'un & de l'autre, & qu'il y a autant de difference de nous à eux, qu'il y a de ceste ville de Rome à vn petit chasteau : Et par là donner à vostre Saincteté iuste occasion de se diuertir de les fauoriser par dessus vn si grand nombre de Princes & Officiers de la Couronne, Seigneurs, & autres personages Catholiques, & de grande valeur & merite, comme voulons esperer, qu'il plaira à vostre Saincteté de faire, si elle trouue bon de cognoistre & considerer les actes vertueux, que nous auons faicts pour le seruice de noz Rois, & de la patrie, comme aussi pour le soustenement de la Religiō Catholique, parce qu'elle les trouuera fort grands, heroïques, & louables, & plusieurs, faicts lors, que la pluspart d'entre eux estoient escoliers, ou ieunes soldats, &

la pluspart de nous estions Capitaines, & combattions contre les huguenots.

Pour ceste occasion donc ie supplie tres-humblement vostre Sainteté au nom de tous les Catholiques royaux de ne nous tenir pour les enfans bastards, & deserteurs de la Religion & de la Couronne, & eux pour les legitimes, & les vrais arcs-boutās de l'un & de l'autre : car nous ne fusmes iamaïs tels, & protestons deuant Dieu de soutenir & deffendre l'un & l'autre, tant qu'il luy plaira de nous laisser en ce mōde, C'est pourquoy il nous seroit tres difficile, voire impossible, de supporter, que vostre Sainteté nous mesprisast, & les supportast par dessus nous, pour estimer & croire de meriter plus grande recompense du saint siege, qu'eux ne font, par la sincerité & candeur de noz intentions, & actes vertueux, qui sōt cogneus du tout esloignez de passion particuliere, mesme ayant supporté iusques à present fort patiemment toutes les indignitez, & mespris, que les Papes vos predecesseurs & vous auez trouué bon de nous faire: lesquels, Pere Saint, continuāt encores, & trouuant bon de nous abandōner, & fauoriser telles personnes, pour

penſer qu'ils nous doiuent accabler & ruiner : cela en premier lieu ne ſe pourra faire, & d'ailleurs ie crains, qu'il ne face faire quelque action extraordinaire à ceux, leſquels iuſques à preſent n'ont voulu laiſſer prēdre racine en leur eſprit à aucune mauuiſe penſee, pour l'affection & deſir, qu'ils ont eu de teſmoigner l'honneur, reſpect, & obeiſſance, qu'ils ont touſiours porté au ſainct Siege, en eſperance, qu'ils ſeroiēt embrasſez humainement, & recognez par voſtre Saincteté, comme ie la ſupplie tres-humblement de vouloir faire, & autrement receuoir en bonne part cet aduertiffement, que ie luy fais, pour me deſcharger de ce qui en pourra aduenir.

Vous ayant, Pere Sainct, bien amplemēt declaré, que l'eſlectiō d'un Roy ne ſe peut faire au preiudice des Princes du ſang, ny conformément aux loix & couſtumes de la France, & arreſts des Parlements, & que quand biē elle ſeroit faicte, elle n'apporteroit plus de moyē & d'argent à ce nouveau Roy Bertault, de ce qu'il peut auoir maintenant, qu'il ne l'eſt qu'en volonté, & partant qu'il ſera contrainct d'eſtre aſſiſté de voz fināces, & de celles du Roy d'Eſpagne,

sinon, il tombera par terre: Et finalement qu'ores qu'il soit esleu, il ne sera au pou- uoir des plus grandes armées de l'establi- & de chasser le nostre, & nous tous, ains que tout cela ne seruira que de desregler l'ordre Ecclesiastique, & affoiblir la religiō catholique, perpétrer mille sacrileges, vio- lemens de femmes & filles, brulemens de villages, meurtres, & vne infinité de cruau- tez & impietez sur le pauvre & innocent peuple Catholique, & d'enflamber le cœur à ceux, qui sont possédez par l'ambitiō ef- frenée de pourchasser la diuisiō de la Cou- ronne: Qui ne sont pas les vrais moyens pour effectuer le saint & iuste desir, qui doit estre en vous de restaurer la religion Catholique, & de conseruer la Couronne en son entier à vn Prince du sang Royal. D'auantage vous ayant, Pere Saint, faict cognoistre, que les actiōs des Catholiques Royaux sont autres, que vostre Sainteté n'a cuidé, & donné occasion de croire que ils meritent, qu'elle en face plus de conte; qu'elle ne pretend faire, si elle desire de les conseruer au deuoir, qu'ils luy doiuent, j'e- stimay de l'auoir suffisammēt informée de l'estat de nostre France, pour l'induire à

priser dauantage la personne & l'auctorité de mō Roy, & d'embrasser l'affaire, duquel ie voulois luy parler, & d'y prendre vne meilleure resolution, que celle, que i'auois apperceu, qu'elle auoit pris (ie diray cela) premier que ie luy eussé baisé les piedz, ie me resolus sur la fin de la deuxiesme audiēce du Ieudy xxv. Nouēbre, de m'esclaircir, si l'intention de vostre Saincteté estoit de me prolonger le terme des dix iours, afin de me resoudre à luy expliquer promptement ma charge, ou remettre à ce faire à tel autre iour qu'il vous eust pleu de me donner, considerant que ledict terme s'approchoit, & qu'il pouuoit facilement couler à mon preiudice, si ie laissois passer ce Ieudy là, sans luy parler de mon affaire, à cause des audiences ordinaires des Vendredis, & Samedis, & quelque autre interruption, qui pourroit suruenir. Et pource ie suppliai vostre Saincteté de me declarer, si elle auoit en fin trouué bon de me prolonger, ou plustost reuoquer l'ordonnance qu'elle auoit faict du terme des dix iours prefix, ausquels elle auoit restrainct mon sejour en ceste ville, suyuant les instances supplications, que ie luy en auois faites

dés le soir xxj. & xxiiij. & les promesses, que elle m'auoit faites d'y aduifer. Surquoy m'ayant de rechef dict, qu'elle y aduiferoit, je luy respondis, qu'il me sembloit qu'elle auoit eu assez de loisir depuis le Dimanche xxj. pour se refoudre, & que ie luy auois donné prou d'occasiõ d'accorder ma supplication, & partât que de nouveau la suppliois tres-humblement de me declarer sa volonté, sans me remettre plus à vne autre fois, parce que ie ne voulois que les dix iours passassent au parauant, que d'auoir executé la charge, que le Roy mon maistre m'auoit donnee. Ce que ne luy ayant pleu de faire, ains de me remettre tousiours à y aduifer, ie me resolus de ne retarder dauantage à luy presenter, comme ie feis, la lettre que sa Majesté luy auoit escrit de sa main en ma creance, avec la traduction d'icelle en langue Italienne, laquelle à cet effect i'auois expressement apportee : Et puis i'adioustay que le Roy mon Maistre m'auoit enuoyé par deuers vostre Sainteté pour luy faire entēdre sa conuersion, & me prosterner de sa part à ses piedz, pour se congratuler avec elle de la ioye & cōsolation, qu'il ressentoit en son ame de s'estre reünny

en l'Eglise Catholique Apostolique & Romaine, hors de laquelle il recognoissoit n'y auoir point de salut, & en laquelle il protestoit de viure & mourir, & de rendre au Sainct Siege toute l'obeissance filiale, & assistance que les Roys ses predecesseurs ont fait, & en particulier à la personne de vostre Saincteté, laquelle il honnoroit & respectoit grandement, & la supplioit tres-humblement de receuoir en gré le deuoir qu'il luy rendoit par moy, & quant & quāt de luy departir sa benediction, & l'absolution, qui luy conuenoit avec voz commandemens, selon qu'il est contenu au memorial, que depuis j'ay présenté à vostre Saincteté le Dimanche cinquiesme du mois dernier, l'asseurant encores, que si les guerres, qu'il auoit contre ses rebelles, ne l'eussent retenu de par delà, il fust luy mesme venu en persōne tesmoigner à vostre Saincteté ceste sienne sincere affection & volonté, comme il en auoit tres-grand desir: ceque ne luy ayant esté permis, il m'auroit choisi pour la plus honorable ambassade, qu'il eust apres Messieurs les Princes du sang Royal, afin de faire apparoir à vostre Saincteté, qu'il desiroit de l'honorer de
tout

tout son pouuoir, & biē qu'il ne m'estimast point inutile de pardelà, & que ie pourrois par mon absence faire quelque faute à son seruice, il m'auroit neantmoins commādē de faire ce voyage, pour vous tesmoigner, que s'il eust peu faire plus grande demonstration d'humilité, & affection à l'endroit du Sainct Siege, & de vostre Saincteté, il l'eust fait, ainsi qu'il est porté par mon instruction, & procuration, & par les deux lettres qu'il auoit escrit de sa main à vostre Saincteté, l'une desquelles luy auoit esté donnée par le sieur de la Chelle dès le xiiij. Septembre, & l'autre presentement par moy: esperant qu'il vous plairoit auoir agreable ceste sienne conuersion, humilité, & deuoir, qu'il vous rendoit, & que trouueriez bon de le receuoir à penitence; & luy departir voz commādemens spirituels. Et en outre ie fis entendre à vostre Saincteté, que pour l'informer du deuoir, que sa Majesté auoit fait en sa cōuersion, il auoit enuoyé avec moy trois Prelats garnis de lettres & pouuoir, lesquels auoient esté choisis par le Clergé qui s'estoit trouué à sa conuersion, afin de luy faire entendre comme le tout estoit passé: lesquels ie sup-

pliy vostre Saincteté auoir agreable, que ie luy amenasse à la premiere audience, l'asseurant, qu'elle receuroit tres-grand contentement d'entendre le respect, qu'ils ont porté au Sainct Siege, & à vostre personne, & qu'ils n'estoient point venus avec vn esprit de cōtradiction, ains plein d'humilité, & que ie seruirois de cautiō à vostre Saincteté, qu'ils se gouuerneroient de ceste façon: à quoy il vous pleut de me respondre, qu'elle y aduiferoit, & me feroit sçauoir sa resolution.

Et comme i'attendois vostre commandement, suruint Monsieur le Maistre de vostre chambre le Lundy xxix. qui me dist de la part de vostre Saincteté, qu'elle se souuiendroit de ce, que ie luy auois dit les iours precedens, & qu'elle desiroit, que ie fisse de mesme de ce qu'il vous auoit pleu de me dire, & que si ie voulois encores parler à vostre Saincteté, elle m'escouteroit benignement, & qu'au reste i'eusse à me despecher, pour partir au plustost, parce qu'il conuenoit ainsi, pour ne donner ombre de vostre bōne volonté par mon sejour plus long en ceste ville à ceux qu'elle deuoit iustement supporter, & qu'estant

venu comme personne priuée, ie n'auois que faire de visiter Messieurs les Cardinaux. Et pour le regard des trois Prelats, qui estoient venus avec moy, il me dit, que vostre Saincteté ne vouloit aucunement leur permettre de luy baïser les piedz auparavant, qu'ils eussent esté se presenter à Monsieur le Cardinal de sainte Seuerine, qui est chef de l'Inquisition, & grand Penitencier : Lesquels propos, Pere Sainct, m'affligerent grandement, ne pouuant croire, qu'ils fussent prouenus de vostre seule volonté, mais d'un conseil fort pernicieux, me semblant, que c'estoit par trop precipiter mon partement, & vn tel affaire de si grande importance, que de me commander dans le viij. iour de partir, & sans m'auoir voulu au parauant declarer, si elle trouuoit bon de retraicter le terme de dix iours, attendu que cet affaire estoit tel, qu'il ne se pouoit presque commēcer en si peu de tēps. D'autre costé il me sembloit, que vostre Saincteté me vouloit fermer la bouche contre toutes les formes de tout temps introduites, pour ne faire entendre à Messieurs les Cardinaux les raisons du Roy mō Maistre, qu'il m'a commandé de leur dire,

& que ie l'auois prié de supplier vostre Saincteté de me faire mettre sa volōté par escrit, afin de la pouuoir exactement considerer, & l'effectuer de tout mō pouuoir: lequel me repliqua, qu'il ne falloit pas, que ie m'attendisse d'auoir aucune responce de vostre Saincteté par escrit: car elle l'auoit ainsi resolu, & aussi que ie n'en auois que faire, pour estre chose aisee à s'en souuenir, & me repeta cela mesme, que ledict sieur maistre de vostre chambre m'auoit dit, tant pour desloger bien tost, que pour ne visiter messieurs les Cardinaux. A quoy ie respondis, que tels commandemens me sembloient estre de telle, & si grande importance, qu'ils meritoient de me les bailler par escrit, pour les considerer: Mais cōme ledict sieur Cardinal, qui est aduisé, recogneut, que ie faisois telle demande seulement pour ma descharge, & pour auoir dequoy iustifier mes actions à l'endroit de mon Roy, il me dit, qu'il ne pensoit pas que vostre Saincteté me la deust bailler, & que i'aurois aussi tost fait d'aller à l'audience de vostre Saincteté, que de m'arrester à rechercher rien par escrit. Et pour le regard de la visite de messieurs les Cardinaux

qu'elle ne me seruiroit de rien , qu'à me donner de l'incommodité: Je luy dis, que telle visite m'estoit fort necessaire, parce que i'auois à parler à eux de l'affaire, pour lequel i'estois venu trouuer vostre Saincteté, & qu'estans conseillers des Papes, ie deuois les informer de cet affaire: lequel sieur Cardinal me respondit, que vostre Saincteté n'estoit obligee à demander l'aduís des Cardinaux, & qu'elle auoit desia faict sa resolution sur ce que ie luy auois parlé. Je remonstray audict sieur Cardinal, que vostre Saincteté ne pouuoit encores auoir faict sa resolution, parce qu'elle n'auoit entendu la creance desdits sieurs Prelats, lesquels partant i'estimois estre tres-necessaire d'amener deuant vostre Saincteté, pour l'esclaircir de leur charge: mais ledict sieur Cardinal continuant tousiours à me persuader, de croire, qu'il n'estoit nullemēt iuste & raisonnable, que lesdits Prelats allassent baisser les pieds de vostre sainteté auparauant que d'auoir iustificié l'action, qu'ils auoient faicte en la conuersiõ de Nauarre (comme il l'appella) & que refusant de le faire, l'on le trouueroit bien mauuais, ie luy respondis, que lesdits sieurs

Prelats ne pouuoient faire vn seul pas sans mon congé, & que tel acte ne dependoit point de leur volonteé, ayans esté enuoyez souz ma charge, pour les presenter seulement à vostre Saincteté, afin de luy rendre conté du deuoir, que ledict Clergé auoit faict, & sa Maiesté aussi à sa conuersion, & comme le tout s'estoit passé conformement aux saincts decretz, & constitutions canoniques, & avec le respect, qui est deu au sainct Siege, & s'asseuroient que vostre Saincteté trouueroit le fait estre tel, qu'elle iugeroit, que le Clergé ne s'estoit point desuoyé de son deuoir enuers le saint Siege, & neantmoins que si vostre Saincteté trouuoit, que lesdits sieurs Prelats eussent en quelque chose failly, qu'ils s'humilieroient deuant elle, & luy demanderoient tel pardon, qu'il conuiendroir, parce qu'ils n'estoient nullement venus avec vn esprit orgueilleux, pour contredire ny disputer avec vostre Saincteté, ains du tout humble & obeissant, pour se remettre au iugement, qu'elle en donneroit, & partant que i'estimois, qu'il ne fust aucunement besoin, ny raisonnable, qu'ils allassent à Monsieur le Cardinal de Sainte Scuerine : Lors ledict

ſieur Cardinal me reſpondit qu'ils ne de-
uoient point faire difficulté, de s'aller pre-
ſenter deuant ledit ſieur Cardinal de Sain-
cte Seuerine; car ce ne ſeroit pas pour les
mal traiter, ains ſeulement pour eſclaircir
l'affaire qu'ils vouloient declarer à voſtre
Saincteté, afin d'euitier les diſputes qui
pourroient arriuer deuant elle, nullement
conuenables à voſtre qualité. Je repliquay
qu'ils ne diſputeroient point, & ſe ſou-
mettroient à voſtre iugemēt & comman-
dement, & luy adiouſtay les raiſons ſuſdi-
tes, & d'autres encores, comme fit auſſi le-
dict ſieur Cardinal les ſiennes, perſiſtant
touſiours en ſon opinion: ce qu'en fin me
donna occaſion de iuger, que l'on deſiroit
pluſtoſt d'enuelopper leſdits ſieurs Pre-
lats, que de vouloir eſclaircir & embrasser
l'affaire, qu'ils auoient à declarer à voſtre
Saincteté, veu le commandement, qui m'a-
uoit eſté fait de m'en aller. Et pource ie dis
audict ſieur Cardinal, que m'ayans eſté leſ-
dits ſieurs Prelats baillez en charge par le
Roy mon maistre, pour les conduire ſeu-
lement pardeuant voſtre Saincteté, & que
leſdits ſieurs Prelats auſſi ayans comman-
dement expreſ de ne faire ſinon ce que ie

leur dirois, que i'estois resolu de ne leur faire faire chose de laquelle ils peussent recevoir de la honte, & moy du blasme de la leur auoir cōseillé, & que si i'auois de propos deliberé voulu endurer les affronts, & indignitez qui m'auoient esté faits, que ie l'auois fait pour tesmoigner à vostre Sainteté la grande humilité du Roy mon maistre, & ma patience, afin de vous donner occasion d'estre benin & gracieux en son endroiect, & que i'estois resolu de ne permettre iamais de tout mon pouuoir, que lesdicts Prelats receussent aucun desplaisir, & que plustost ie me laisserois trancher la teste, voire mettre mon corps en quatre quartiers, que d'y consentir: & partant que ie le suppliois de vouloir interceder enuers vostre Sainteté ceste faueur, qu'ils vous peussent baiser les piedz, & effectuer leur charge. Lequel sieur Cardinal voyant ma resolution si ferme, apres m'auoir tenu quelques autres propos, trouua bon de me permettre de le faire entendre à vostre Sainteté, & quant & quant la supplication que ie luy faisois de vouloir me faire bailler par escript le commandement, qu'elle m'auoit faict de m'en aller au plustost,

& de l'exclusion de visiter Messieurs les Cardinaux.

Et comme j'esperois d'auoir quelque responce fauorable, ledict sieur Maistre de vostre chambre reuint me trouuer le Mardy ensuiuant trentiesme Nouembre, & me dist, que vostre Saincteté persistoit en sa resolution de ne receuoir point lesdits sieurs Prelats, au parauant qu'ils fussent allez pardeuant Monsieur le Cardinal de sainte Seuerine, parce qu'il conuenoit ainsi à sa qualité: Et pour la visite de Messieurs les Cardinaux, que ie n'auois que faire de prendre telle peine pour si peu de temps, que i'auois à demeurer icy: ioinct que vostre Saincteté estimoit, que ie n'eusse aucun affaire à traicter avec elle, pour m'auoir laissé venir comme personne priuee, & non chargée d'affaires quelconques pour Nauarre, & me redist, que, si ie voulois parler encores à vostre S^{te}, elle me dōneroit audience: Je luy respondis que pour le regard de Messieurs les Prelats, que ie suppliois tres-humblemēt vostre Saincteté, de trouuer bon que ie les luy amenasse, & que ie ne receusse point ce deshōneur, que de les renuoyer audict sieur Cardinal,

parce qu'il me seroit impossible de le supporter, ne faisant aucun cas de ma vie, ou alloit de mon honneur: Et pour le regard de la visite de Messieurs les Cardinaux, que ie suppliois pareillement vostre Saincteté, de se souuenir, que ie luy auois donné vne lettre de la part du Roy mon Seigneur, & déclaré l'occasion de ma venuë, & par là faißt cognoistre, que i'auois apporté vn affaire tres-grand, & digne d'estre considéré tant par vostre Saincteté, que par le sacré College de Messieurs les Cardinaux, lesquels partant il me conuenoit de visiter: Lors lediët sieur Maistre de vostre chābre me demanda, si le Pere Poussuin ne m'auoit pas déclaré, que vostre Saincteté ne vouloit aucunement, qu'arriuant en ceste ville i'eusse à luy parler des affaires de Nauarre: Je luy respondis, que non, & que si vostre Saincteté m'eust faißt faire ce commandement, i'eusse aduisé à faire aussi ce, que i'eusse estimé me conuenir: Et partant que ie le priois de supplier vostre Saincteté de m'accorder ce, que ie luy demandois, comme chose iuste, & raisonnable, & par mesme moyen oster le terme de dix iours, lequel me promist de le vous faire enten-

dre. Et craignant, que le lendemain Mercredy, auquel expiroient les dix iours, ne passast à mon preiudice, pour n'auoir voulu accepter l'audience, que vostre Saincteté m'auoit enuoyé offrir premier, que d'estre asseuré de luy amener lesdits sieurs Prelats, i'enuoyay le matin dudiect Mercredy le sieur de Niuolon l'un des Maistres d'hostel de sa Majesté audiect sieur Maistre de vostre chambre, pour sçauoir la responce de vostre Saincteté, particulièrement sur lesdits sieurs Prelats, afin de me resoudre à ce, que ie serois contrainct: laquelle n'ayant peu auoir, ie le renuoyay le Ieudy matin, & puis l'apresdinee ie reuoyay le sieur Alexandre d'Elbene, qui en fin ne m'apporta autre responce dudiect sieur Maistre de vostre chambre sur tout ce, que ie l'auois prié de supplier vostre Saincteté, sinon que i'aurois audience le Dimanche ensuiuant cinquiesme du passé: laquelle offre vnique me despleut grädement: & neantmoins ie fus contrainct de l'accepter, puis que telle estoit la volonté de vostre S^{te}, & qu'il m'estoit impossible de faire autrement.

Suiuant vostre commädement i'allay le dit iour me presenter deuant vostre Sain-

esté en espérance de recevoir voz' commandemens sur ce, que ie l'auois fait supplier, laquelle d'abordée se plaignit à moy, dequoy lesdits sieurs Prelats ne vouloient aller trouuer lediët sieur Cardinal de sainte Seuerine, suiuant ce qu'elle m'auoit fait entendre, & puis me dist, que s'ils auoient quelque doute d'aller deuant luy, qu'elle se contentoit, qu'ils allassent par deuant Monsieur le Cardinal d'Arragone chef de la congregation de France, adioustant, que elle trouuoit fort estrange, qu'ils ne luy voulussent obeyr. A quoy ie respōdis à vostre Sainteté, que lesdits sieurs Prelats ne pouuoient faire rien d'eux mesmes, ains seulement ce, que ie leur dirois : Et bien que i'eusse amplement dit à Monsieur le Cardinal de Toledo mon intention, que ie la suppliois ne trouuer mauuais, si ie luy disois de ne pouuoir aucunement permettre, que lesdits sieurs Prelats estans sous ma charge fissent chose prejudiciable à leur qualité, de crainte de n'en recevoir moy-mesme le des-honneur, & que si i'auois souffert des indignitez, que cela estoit prouenu de ma seule volonté, pour l'esperance, que i'auois prise par tel,

le humilité de donner occasion à vostre Saincteté d'embrasser avec douceur & clemence l'affaire , que ie luy voulois presenter , & que i'estimois ne m'estre aucunement licite & honorable de conduire lesdits sieurs Prelats ailleurs , que pardeuant vostre Saincteté, à laquelle seule ils auoient esté deleguez: neantmoins s'il vous plaisoit de trouuer bõ de les admettre vne fois seule à voz pieds, & puis sans leur donner longue audience les renvoyer par deuant l'vn de Messieurs les Cardinaux voz nepueux, cõme voz ministres, & representans vostre personne , assisté de mōsieur le Cardinal d'Arragõne, & de tels autres Cardinaux, qu'il vous plairoit, cõme de rechef ie vous ay dit en la derniere audience sur certaine difficulté, qu'il vous pleust de me faire, que ce seroit chose pl⁹ tolerable, que non pas de les renvoyer par deuant l'vne des deux congregations. Ce que toutefois vostre Saincteté ne trouua pas bon, ains il luy pleust de me dire, que nonobstant ce que ie luy auois auparauant faiët entendre, que si ce n'estoit pour l'amour de moy elle les auroit mal traictez , que neantmoins elle y aduiseroit , comme depuis

i'ay recongneu, qu'elle a fait.

Car Monsieur le Cardinal de Toledo m'estant venu trouuer de vostre part le Vendredy septiesme de ce mois de Iāuier, me dit, que vostre Saincteté se contentoit, que lesdits sieurs Prelats allassent trouuer Messieurs voz nepueux, asistez de Messieurs les Cardinaux d'Arragonne, de sainte Seuerine, & de luy, & qu'apres les auoir ouys, ils feroient rapport à vostre Saincteté de ce, qu'ils leur auroient dit, & qu'il sembloit n'estre pas raisonnable, qu'ils allassent se presenter deuant vostre Saincteté auparauant, qu'ils eussent fait cognoistre estre autres, que vostre Saincteté les estimoit: Adioustant plusieurs autres raisons, pour approuuer son dire, auquel ie fis presque la mesme responce, que lesdits sieurs Prelats ne pouuoient rien faire d'eux mesmes, parce qu'ils auoient charge de n'outrepasser chose quelconque de ce que ie leur dirois. Et pour ceste occasion ie persistois en la mesme opinion que i'auois déclaré cy deuāt, qui estoit de supplier tres humblement vostre Saincteté de trouuer bon, qu'ils s'allassent ieeter à voz pieds auparauant que d'aller par deuant Messieurs

voz nepueux, non pour disputer avec elle, ains seulement pour effectuer le commandement que i'auois, estimant, que ma requeste estoit si raisonnable, que vostre Sainteté ne pouuoit me la refuser : Lequel sieur Cardinal repliqua, que lesdits Prelats n'estoiēt icy venus comme Ambassadeurs, parce que vostre Sainteté ne les auoit admis pour tels. Et partant que comme personnes priuees elle ne les vouloit escouter, premier qu'ils n'eussent esté rendre cōte de ce qu'ils auoient fait, & qu'on l'eust rapporté à vostre Sainteté: A quoy ie respondis, qu'encores que vostre Sainteté ne trouuaſt bon de les estimer pour Ambassadeurs, ils ne laissoient pour cela de l'estre, ayans leurs pouuoirs bien expediez, & que les tenant pour tels, ie ne pouuois charger la resolution, que ie luy auois dit dès la premiere fois, qu'il me parla, quand ce seroit pour me trancher la teste, & mettre mon corps en quatre quartiers. car de mō consentement ils ne feroient iamais autrement. Lors ledit sieur Cardinal me dit, que vostre Sainteté ne feroit aussi autre chose, & me demāda, si i'auois fait à vostre S^{te} la mesme proposition & supplication, que

que ie venois de luy dire , cuidāt que j'eusse supplié vostre Saincteté de les faire seulement ouyr par Messieurs vos neueux , & non pas de les introduire auparauant à voz pieds : auquel ie fis responce , que toutes mes propositions & supplications auoient tousiours tēdu de les introduire aux pieds de vostre Saincteté , ainsi qu'elle en estoit fort bon tescmoin. Et partant que ie la suppliois de trouuer bonne ceste mienne resolution , fondee seulement sur le doute que i'auois d'estre blasmé, si ie permettois que lescdits sieurs Prelats receussent quelque affront: Et aussi que i'estimois, que tel acte ne seruiroit plus de rien , puis que vostre Saincteté vouloit continuer en sa resolution de me renuoyer sans aucune responce, comme ie le diray en son lieu. Surquoy ledit sieur Cardinal me respondit, qu'il feroit entendre ma resolutiō à vostre Saincteté , laquelle, il pensoit , ne changeroit point la sienne, comme ie l'ay tresbien cogneu.

De sorte, Pere saint, que ie suis contraint de dire à vostre saincteté, que i'ay vn extreme regret, de n'auoir peu obtenir d'elle permissiō de luy amener lescdits sieurs Pre-

lats, pour se prosterner deuant ses pieds, & luy faire cognoistre le deuoir, que nostre Roy a fait en sa conuersion, & le respect, que Messieurs du Clergé ont porté au S. Siege, & à l'auctorité souueraine de vostre Saincteté: car ie m'asseure qu'elle eust receu beaucoup de contentement, d'entendre la façon, avec laquelle on s'estoit gouuerné en telle action, & eust pris autre & meilleure opinion du Roy mon maistre, & dudit Clergé, qu'elle ne luy a esté donnée, & consequemment eust eu iuste occasion de faire toute autre résolution, que celle qu'il luy a plu de me declarer, dont ie rapporte avec moy vn merueilleux desplaisir, considerant, quel sera celuy que prendrôt ceux qui entendront telles negatiues, si importantes à l'affaire que i'ay traicté avec vostre Saincteté, comme estant le fondement & base d'iceluy.

Me voyant donc frustré en ladicte audience du cinquiesme du passé, de pouuoir introduire à vostre Saincteté lesdits Sieurs Prelats, pour acheminer l'affaire, qui m'auoit amené à ses pieds, & debouté de parler à Messieurs les Cardinaux, & veu peu auparauant precipiter mon partement, au

lieu de le prolonger, & qui plus est, ayant recogneu vostre Sainteté en toutes les trois audiences precedentes, fort resoluë de n'absoudre mon Roy, me disant d'elle-mesme, sans que ie luy parlasse de ce faict, qu'elle ne vouloit croire qu'il fust bien cõuerty, si vn Ange du Ciel ne venoit le luy dire à l'aureille. Je me trouuay fort affligé, me voyant reduit à traiter mō affaire avec vostre sainteté, par autre moyen, qu'il cõuenoit à la qualité d'iceluy : neantmoins pour ne deffaillir en riē, qui fust en ma puissance, pour tascher de rendre mon Roy content & satisfait en son ame, & esclaircir le monde, qu'il n'auroit tenu à moy de faire tout ce, qui estoit possible pour obtenir de vostre Sainteté la requeste de sa Maiesté : ie me resolus de ne laisser passer l'occasion de la susdite audience, craignāt qu'elle fust la derniere, sans effectuer au moins mal, que ie pourrois, le commandement de mon Roy : Et pource afin de fleschir la volonté de vostre sainteté à accorder plus facilement ma treshumble requeste, ie m'agenouillay deuant ses pieds, & la suppliay tres-humblemēt de vouloir commander à mon Roy penitent, ce qu'il au-

roit à faire pour effectuer ce qui luy auoit esté ordonné par messieurs les Prelats au mesme temps qu'il fit l'abiuration, & qu'ils luy donnerent l'absolution, & en tout euenement, & pour plus grande assurance de sa conscience, luy donner absolution, & tout autre remede pour le salut de s^{on} ame, cōme le vray vicaire de Iesus Christ, qu'il recognoissoit en terre. Et me voyant interrōpu par les negatiues que vostre Sainteté me faisoit incessamment, ie l'interpellay, tenāt les mains iointes, de m'accorder ladiēte absolution au nom de Iesus Christ, & du precieux sang, qu'il auroit espanché en l'arbre de la croix, pour racheter le genre humain, voire les Payens & infideles, & la suppliay tres-humblement d'imiter le berger contenu en l'Euangile, qui alloit chercher la centiesme brebis, & le pere de famille qui estoit allé au deuant de son enfant prodigue. Ie la cōiuray aussi par le nom de Clement, que vostre Sainteté a voulu prendre à l'aduenement du Pontificat, de vouloir se rendre clement & misericordieux en l'endroit de m^{on} Roy. Ie luy fis voir & toucher toute ouuerte la procuration que mon Roy m'auoit donné pour

ce faire, signee de luy, scelee de son seal, & contresignee Reuol, l'un de ses secretaires d'Estat. Je me prosternay à terre luy baïsant les pieds, pour n'oublier aucun deuoir d'humilité, & pour penser de la fleschir à interiner ma tres-humble requeste, laquelle comme ie l'estimois tres-iuste, & que ie vis que vostre Saincteté continuoit à me la refuser tout à plat, ie fus cōtraint de luy représenter le malheur auquel ie serois reduit, rapportant telles negatiues si cōtraires à l'attente des bons François, & en telle action ie me trouuay le cœur si fort saisi & oppressé de douleur, voire reduict en tel desespoir, que les larmes m'en vindrēt aux yeux, ainsi qu'elle s'en apperceut me les voyant essuyer, & ma voix changée de son ordinaire: en laquelle affliction neantmoins ie remarquay vostre bon naturel, prenant pitié & compassion de moy, me commandant par plusieurs fois, voire me contraignant de me leuer, & de me rasseoir: ce que finalement ayant faict & recogneu, qu'elle demeuroit ferme en sa rigoureuse resolution, ie me deliberay de donner à vostre Saincteté le memorial signé de ma main, cy en fin transcrit, qui contenoit en substan-

ce ce que ie luy auois dit de bouche, parce que ie ne voulois accepter vne si rigoureuse responce, ains donner loisir à vostre Saincteté de considerer ledict memorial, & d'addoucir sa resolution, & parce ie la suppliy de le voir, & puis de me faire sçauoir sa volonté: surquoy il vous pleust, Pere Sainct, de me consoler d'une fort gracieuse responce, disant qu'elle verroit & cōsidereroit ledit memorial, & puis qu'elle me feroit sçauoir sa resolution: ce qui donna quelque allegement à mon affliction, & en tel estat ie pris congé d'elle.

Depuis voyant que vostre Saincteté n'auoit les iours ensuiuans assemblé les deux congregations, comme elle auoit faict les autres fois, que ie luy auois parlé, pour me faire aussi tost responce, afin de me renuoyer, ains qu'elle couloit le temps: ie pris quelque esperance, qu'elle eust addoucy la rigoureuse resolution, qu'elle m'auoit declaree: mais ayant esté aduertty qu'au consistoire qu'elle tint le Lundy vingtiesme dudit mois, elle auoit déclaré ouuertemēt à Messieurs les Cardinaux de ne vouloir point donner au Roy mon Seigneur ladite absolution, ie demeuray tout confus en

mon esprit, & autant ou plus affligé, qu'au parauant. D'ailleurs aussi ayant sceu que Monsieur de Montorio venu de la part du Sieur Cardinal de Plaisance, & de Monsieur de Mayenne, auoit proposé de leur part, qu'ayant esté asseurez que vostre Sainteté n'accorderoit point la requeste de mon Roy, il seroit expedient de m'amuser de par deçà, afin de me faire perdre icy le tēps inutilement, sans rendre le deuoir que ie dois à mon Roy tres-Chrestien, & à ma patrie, cuidans possible, que ie ne serois inutile de par delà, ie me resolus pour ne me laisser musser, d'enuoyer le Ieudy 22. à Monsieur le M. de vostre chambre vn petit memorial ou requeste cy en fin transcrite, pour ne l'importuner d'vne audience, afin de supplier tres-humblement vostre Sainteté, comme i'auois fait plusieurs autres fois auparauant, de me vouloir donner par escrit la responce qu'elle vouloit que ie rapportasse au Roy mon Seigneur, pour ne faillir en rien à luy declarer precisement & ponctuellement vostre volonté, & luy représenter la verité de vostre intention, cōme il me sembloit estre necessaire de faire en chose de si grande importance: lequel

promit de la bailler à vostre Saincteté. Et comme i'esperois d'auoir ladite respōce, ledit sieur M. de vostre chambre me fit entendre le Mercredy 29. qu'elle me donneroit audience le Dimanche deuxiesme de ce mois de Ianuier, ne le pouuant faire plus tost, à cause des seruices qu'elle estoit tenue de faire à Noël, & de quelques autres interruptiōs : auquel ie rēuoyay ledit sieur de Niuolon, pour luy dire que ie ne pretēdois d'importuner vostre saincteté par vne nouuelle audience, ains seulement que ie la supplioye tres-humblement, de me faire donner par escrit la respōce à mondit memorial, pour la raison cōtenuë au dernier, & partant ie le prioy e de le faire entendre à vostre Saincteté. Ce que ledit M. de vostre chambre s'excusa de faire, disant, que lors qu'il bailla à vostre saincteté ledit petit memorial, elle luy dit, me vouloir faire respōse au premier iour, qu'elle me pourroit donner audiēce, & qu'il n'oseroit l'importuner dauantage de telle chose, puis qu'il la voyoit resoluë de me faire response verbale, & non par escrit: chose qui me fit refoudre d'accepter ceste vnique proposition, puis que ie ni'y voyois contrainct.

Et pource i'allay le Dimanche deuxiesme de ce mois pour me rēdre aux pieds de vostre Saincteté, où estant, ie luy remonstray que le Roy mon Seigneur luy auoit escrit deux lettres de sa main, l'vne desquelles vous fut presentee par le Sieur de la Cliele le xiiij. Septembre, & l'autre par moy, le 25. Nouembre, & aussi que i'auois donné à vostre Saincteté vn memorial signé de ma main, le 5. Decembre, & fait pareillement donner vn autre le 23. par ledict sieur M. de vostre chambre : ausquelles lettres & memoriaux il me sembloit que vostre Sainteté deust me faire [r]esponse, estant l'affaire de telle consequence, qu'il meritoit bien de la mettre par escrit, comme l'on estoit coustumier de faire en semblables negociations, & si importantes, mesmes estant venu de si loin pour cet affaire seulement, & que le desir que i'auois de rapporter à mon Roy la precise response de la volonté de vostre sainteté, & n'y faillir aucunemēt, m'auoit fait l'importuner par plusieurs fois de me la faire dōner par escrit, afin aussi de me guarantir du blasme que l'on me donneroit partant d'aupres de vostre Saincteté, fās retirer vn seul mot d'escrit en respō-

ce desdites lettres & memoriaux, que cela seroit venu par ma faute & ignorance, ou que vostre S^{te} m'eust voulu traitter en fol ou en enfant, dont ma reputation & honneur y seroient grandement engagez, mesmes puis que ie ne rapportois à sa Maiesté la consolation qu'il s'attendoit auoit pour le salut de son ame, ny esperāce d'en auoir aucune: Aussi que ie ne pouuois me charger d'aucune respōce verbale, puis que vostre S^{te} ne me donnoit lettre de creāce, & partāt que ie me trouuois reduit à ne rapporter à sa Maiesté, q̄ les negatiues de tout ce que i'auois supplié vostre S^{te}, laquelle trouua bon de me dire, qu'elle estoit resoluë de ne me donner aucune réponse par escrit, parce qu'elle auoit sceu que l'on auoit brulé à Tours, les Bulles, & autres actes q̄ les Papes ses predecesseurs auoient enuoyé en France, & qu'elle ne vouloit point qu'il en aduint de mesmes de ce que elle me bailleroit par escrit. D'auantage qu'elle traitoit ordinaiemēt d'affaires importās avec l'ābassadeur d'Espagne, & autres, & qu'ils ne luy demandoiēt riē par escrit, & qu'elle mesme auroit esté en Pologne & autres lieux pour negoces importās

pour lesquels elle n'auoit rien donné par escrit, & qu'il me deuoit suffire de ce qu'il vous plaisoit de me dire verbalement. A quoy vostre Sainteté se souuiendra s'il luy plaist, que ie luy dis, que ie sçauois fort biẽ, qu'en affaires qui se traictoient pour simples recommandations, & autres semblables negoces, l'on ne se soucioit de retirer responce par escrit : mais qu'en tell' affaire qu'estoit le miẽ, outre que vostre Sainteté auoit eu deux lettres escrites de la main du Roy mō Seigneur, & deux memoriaux de moy, ie luy auois aussi parlé bien ample-ment de sa cōuersion & absolution, & des commēdemens de l'Eglise, que sa Majesté desiroit auoir de vostre S^{te} pour faire le salut de son ame, & par là tesmoigner l'ardent desir, qu'elle auoit d'estre concilié avec le S. Siege, & partāt qu'il me sembloit qu'elle me deuoit donner vn petit mot de responce, afin d'esclaircir mon Roy de vostre volōté, & de ce qu'il auoit à faire aussi, pour ne rendre mon voyage inutile, & que le doute que vostre S^{te} auoit, qu'en France l'on fist quelque mespris de ce, qu'elle bailleroit par escrit, cōme auoit esté faict de la responce, que le pere Alexandre He-

brahin auoit dōnée de vostre part à Monsieur le Cardinal de Gondy, n'estoit aucunement bien fondee, parce que si vostre Saincteté estimoit, que la responce, qu'il vous plairoit de me faire, estoit conuenable à la qualité de Vicaire de Dieu, & par conséquent iuste & raisonnable, elle ne deuoit point craindre de me la bailler par escrit, pour iustifier ses actions à l'endroit de tout le monde. Car estant bonne & sainte, elle ne seroit mesprisee & bruslee. Si aussi vostre Saincteté estimoit qu'elle ne fust telle qu'il appartenoit à la qualité de iuste iuge, & pere misericordieux, & doutast qu'elle ne fust trouuee mauuaise, qu'il me sembloit, qu'elle la deuoit corriger, comme il appartenoit.

Et sur ce propos ie dis à vostre S^{te}, que le respect & honneur que le Roy mō Seigneur vous a porté depuis xviij. mois en çà, a esté cause, qu'il a empesché, que les Parlemens n'ayent fait quelque grāde declaration sur le pouuoir, que vostre S^{te} a donné audiēt sieur Cardinal de Plaisance, pour assister à vne eslection de Roy si contraire, & preiudiciable à son auctorité, ayāt voulu postposer son particulier interest au

respect qu'il vous portoit:& par ce il def-
fendit au Parlemēt de Tours, & à tous les
autres, de faire aucun arrest, cōme est leur
coustume, pour soustenir les droicts de la
Couronne:tellement qu'il n'y eust q̄ celuy
de Chaalons qui fit quelque declaratiō, au-
parauant que d'auoir sceu la volōté de sa
Majesté:laquelle luy ayant esté enuoyee, il
ne passa outre à faire la grande declaratiō,
qu'il auoit arresté par le premier arrest:En-
quoy vostre S^{ae} doit cognoistre la bōté de
nostre Roy,& l'affection, qu'il vous a por-
tee,laquelle ie diray encores, qu'il n'a vou-
lu perdre,ores que vous, & vostre Legat à
Paris ayez depuis continué à luy en dōner
de grādes occasions, cōme il se peut voir,
outre ledit pouuoir, par les lettres & actes
qui ont esté faits à Paris. Ce qui me sēble,
Pere S. deuoir vous induire à addoucir vo-
stre rigueur en son endroit,cōsiderant que
la bōne volōté que sa Maieité porte à vo-
stre personne, prouient d'un cœur franc &
generoux,& nō d'aucun sien particulier in-
terest, outre q̄ vostre S^{ae} feroit vn œuvre
meritoire, que de receuoir vn Prince de
telle importance, qui peut attirer par son
exemple, & auctōrité les milliers d'ames

desuoyees : & pour ce, de rechief ie me remis à genoux à voz pieds, vous suppliant tres-humblement d'interiner ma requeste, ou memorial.

Et par ce que vostre S^{te} trouua bon de persister en sa premiere resolutiō, pour ne vouloir croire que la conuersion de mon Roy fust bonne, ie la suppliay de me declarer, ce qu'elle pretendoit, & desiroit que sa Majesté fist, pour la luy tesmoigner estre bōne, & la rēdre cōtente de ses actiōs: Surquoy il vous pleust de me dire, qu'il fist le contraire de ce, qu'il auoit fait cy deuāt. A quoy ie respondis, qu'il auoit cy deuāt fait des choses, qu'il luy estoit impossible de faire maintenāt le cōtraire, & qu'il n'estoit Theologien, pour sçauoir quelles œuures il deuoit faire pour se preparer à meriter la grace de V. S^{te}: laquelle me repliqua, qu'il y auoit en France des Theologiēs capables pour le luy dire. Lors ie suppliay vostre S^{te} de me declarer, si elle se rapporteroit à ce, que lesdicts Theologiens luy diroient. Ce qu'elle ne voulut faire: qui me donna occasiō de luy repliquer, que ie ne sçauois quel cōseil dōner à mō Roy, pour bien faire, puis qu'il ne vous plaisoit de me

declarer les œuvres préparatoires , qu'il deuoit faire pour le salut de s^{on} ame, & que c'estoit le ietter en desespoir. Ce q^{ui} iamais n'auoit voulu faire Iesus Christ, ains estoit allé rechercher les pecheurs, pour les enseigner, & donner occasion de se cōuertir. Surquoy il vous pleust de me dire, qu'elle n'estoit tenuë de les luy declarer, & m'allequa quelque exēple de la sainte Escriture, auquel ie ne m'auançay de respōdre pour n'auoir beaucoup estudié en la Theologie, m'estant tousiours voulu rapporter à ce, que nostre mere sainte Eglise en auoit ordonné. Toutesfois qu'avec sa permissiō ie luy dirois, qu'il me sēbloit, que les sermōs des predicateurs ne tēdoient, qu'à instruire le peuple, & à luy proposer les œuvres préparatoires, pour sauuer leur ame: ce que i'estimois, que vostre S^{cté} deuoit faire à l'endroit de mon Roy, pour n'estre pas moins tenuë enuers luy souz peine de peché mortel, qu'est le pere d'assister ses enfans de conseil pour le salut de leur ame, ainsi qu'il est déclaré par les œuvres de misericorde, qui sont plus notoires à vostre S^{cté}, qu'à moy: Adioustant, que ce n'estoit le vray moyen d'attirer les desuoyez de la

religiō Catholique à venir à Rome, recourir aux saints Peres, pour auoir instruction de ce qu'ils auoient à faire, pour se ranger au giron de l'Eglise de Dieu. & que ie craignois, que telle façon de faire ne fust trouuee fort mauuaise, voire qu'elle ne dōnast occasiō à quelques vns de croire, que vostre S^{cté} fust bien aise de reiecter toutes les ouuertures, q̄ lon luy faisoit, pour redresser le Roy mon Seigneur à venir au giron de l'Eglise. Car vostre S^{cté} ne s'expliquoit point, cōme il me sembloit qu'elle deuoit faire, pour attirer à soy vn Prince desuoyé. Surquoy vostre S^{cté} me respōdit, que Nauarre sçauoit biē ce qu'il deuoit faire, sans qu'elle luy dist, me repetant n'estre tenuē luy declarer les œuures preparatoires. Car elle l'auoit fait consulter par des Theologiens, & ne vouloit passer plus auant. Lors ie m'auāçay de vous supplier de m'esclaircir d'vn autre doute, qui m'estoit suruenu sur tels refus, qui estoit, si vostre S^{cté} entēdoit, que le Roy mō Maistre allast cy apres à la Messe, comme il a fait cy deuant, & receust le precieux corps de nostre Sauueur, ou bien s'il s'en abstiendra, craignant que s'il continuoit à faire, comme il a fait, que
vostre

vostre S^âé ne l'eust agreable. Si aussi il cessoit d'aller à la Messe, ie doutois qu'il donnast occasion au monde de le tenir pis que Payen, viuât sans aucune forme de religiō, & que ses ennemis prissent occasiō de dire qu'il seroit retourné à son premier erreur, & qu'il auroit fait cognoistre, que sa conuersiō n'estoit que feinte & dissimulee. Et d'autāt que ie cognoissois ce fait de grāde importance, tāt pour la personne du Roy, que pour si grand nombre de bons Catholiques qui l'assisteroiēt à la Messe, ie la suppliy tres-humblemēt de me commander ce qu'elle entendoit que sa Majesté fist. Ce que vostre S^âé me semble, trouua de grande importāce, & digne d'y faire vne bonne resolution, & pour ce ne luy pleust m'en faire aucune responce, laquelle ie me résolus de ne requerir sur l'heure, afin de luy donner loisir d'y pēser, & la resoudre pour apres me la faire sçauoir.

Et continuāt mon propos ie remonstray aussi à vostre S^âé, qu'il y auoit plusieurs Eueschez, & Abbayes vacantes, grande partie desquelles estoient dans les villes & pays de l'obeissance du Roy, & maintenāt tenuës par des œconomats, sans que l'or-

dre & regle Ecclesiastique y fust gardé, cō-
me il appartenoit, & que le desordre estoit
encores plus grand aux Eueschez, ou il n'y
auoit personne pourueu, parce qu'il ne s'y
faisoit de cresse, ny de Prebstrs, dont la
plupart des paroisses demeurent sans Cu-
rez, & que ceux que le Roy auoit nommé
à vostre Saincteté estoient disposez d'en-
uoyer vers elle apres mō retour, pour ob-
tenir les Bulles, lesquels maintenant diffè-
reroient de ce faire, me voyans retourner
de pardela avec vne depesche si contraire
à leur attente, qui proprement fermoit la
porte à tous les François Royaux de re-
courir au saint Siege. Et partant que ie
desirois de m'esclaircir de la volonté de
vostre Saincteté, pour la rapporter en Frā-
ce: Car ie craignois, qu'il ne fust remis en
auant, & possible embrassé certain regle-
ment, qui auoit cy deuant esté dressé tou-
chant l'expedition desdites Bulles, pour
estre gardé par forme de prouision, & ius-
ques à ce que Gregoire quatorzième eust
adoucy sa rigueur, & seuerité à l'endroit
du Roy, & de tant de bons Catholiques,
qui le seruoient, & qu'il fust deliuré du
tres-pernicieux conseil Espagnol, qui le

detenoit enueloppé, & luy faisoit faire ce qu'il vouloit, & conséquēment fust mieux conseillé. lequel reglement pour lors fust reiecté par l'aduis de plusieurs personna- ges d'hōneur, sur l'esperāce que l'on prist, que le sainct Pere embrasseroit la paix de nostre Royaume : laquelle esperance estāt perdue par mon retour, seroit cause de la faire maintenant effectuer. Chose, que ie recognoissois fort bien, qui apporteroit beaucoup de desplaisir à vostre Saincteté, & tels desordres que vostre Saincteté pou- uoit iuger : lesquels à mon particulier me faisoient herisser les cheueux, & trembler mon cœur à y penser seulemēt, pour m'en veoir le porteur par vostre ordonnance, & toutesfois sans ma coulpe. Et partant ie suppliay vostre Saincteté de me dire, com- me elle entendoit, que l'on eust à se gou- uerner, pour le regard desdites Bulles : A quoy elle me respondit, qu'elle ne pouuoit les faire depescher à la nomination de Na- uarre, pour ne l'estimer Roy : & neātmoins que sur tout ce que ie luy auois parlé, elle y pēseroit, & puis me feroit sçauoir sa vo- lonté : & avec telle responce ie me licen- ciay d'auec elle ledit soir du Dimanche ij^e.

Et comme i'attendois d'auoir par escrit la volonté de vostre Sainteté sur tout ce que ie l'auois supplié, Monsieur le Cardinal de Toledo vint le Vendredy ensuiuant septiesme de ce mois de Ianuier, me trouuer, comme i'ay dit, de la part de vostre Sainteté, pour me dire, qu'elle ne se tenoit point obligee de me bailler rien par escrit, parce qu'elle ne pretendoit que ie luy eusse dit aucune chose de la part de Nauarre, pour m'auoir mandé au parauant mon arriuee en ceste ville, qu'elle estoit resoluë de ne me receuoir comme Ambassadeur, & partant qu'elle ne vouloit receuoir de sa part, q'ce i'auois traicté avec elle, sans de la mienne seule, comme par forme d'un propos familier que i'eusse fait à vostre Sainteté. Ce que i'ay trouué si estrange, que j'en demeuray fort estonné : Et Apource, ie le suppliy de me pardonner, si ie le priois de me dire de rechef la volonté de vostre Sainteté, parce que ie ne l'auois peu bien comprendre. Ce qu'il trouua bon de faire, & non content de ce, ie la luy repetay, afin d'estre bien assure de l'auoir bien comprise : Et puis ie luy dis, que ie m'estonnois grandement de ceste respõse,

& beaucoup plus de la raison, sur laquelle il la fondeoit, parce que vostre Sainteté se souuenoit fort bien que ie luy auois donné vne lettre escrite de la main du Roy mon Seigneur, & supplié instamment de vouloir donner audience à Messieurs les Prelats, & à sa Maiesté despartir les tresors de l'Eglise necessaires pour le salut de son ame, comme il estoit porté par vn ample memorial signé de sa main, que i'auois donné à vostre Sainteté: de sorte que ie me trouuay bien estonné de voir maintenant, que vostre Sainteté vouloit que ce que i'auois traicté avec elle de la part du Roy mon Maistre, fust chose comme non aduenüe, ains comme d'un discours familier que ie luy auois fait: Et pour ce ie le suppliy de me declarer bien particulièrement si vostre intention estoit telle: Ce qu'il fit, me repetant par plusieurs fois, que vostre Sainteté ne se tenoit nullement obligee de me bailler aucune responce par escrit, par ce qu'elle n'entendoit aucunement, que ce que ie luy ay dit, ait esté de la part de Nauarre, ains seulement de la mienne, comme par forme d'un parler familier, qui seroit ensuiuy

Discours de la Legation

entre vostre Saincteté & moy. Je fus contraint de luy dire que ie trouuois ceste resolution si estrange, & contraire à mon attente, & à l'occasion de ma venue, que i'en demourois tout confus en mon esprit, & qu'il me sembloit, que c'estoiēt ieux d'enfant : car encores que i'accordasse que vostre Scté ne m'ait voulu admettre comme Ambassadeur de mō Roy, que neātmoins ie n'ay iamais creu qu'elle m'ait voulu empêcher de luy parler, cōme feroit vn simple Procureur *di Campadolio ô del Borgo* de la part d'un Roy penitent, qui se vient humilier au saint Siege, & à sa Saincteté, pour luy rēdre le deuoir qui luy est deu, comme au vicaire de Dieu, & aussi pour le desir qu'il auoit de faire le salut de son ame : & que ie n'auois iamais ouy dire, q̄ l'on deust fermer la bouche aux desuoyez de la religion, desirans de se conuertir en la reconnaissance du saint Siege, & que ie trouuois ceste responce si rude & estrange, que ie tenois pour tout certain, qu'elle mettroit au desespoir beaucoup de personnes, & qu'il vaudroit mieux que vostre Saincteté me fist iecter en vn sac dās l'eau avec mon fils, & ceux qui s'en retourneroient

en France avec moy, que non pas de nous laisser partir avec vne telle responce: laquelle à la verité me mettoit en tel desespoir, que ie souhaittois de m'estre rompu vne iambe auant mon partement de France, pour n'estre reduit de porter vne responce si estrāge en nostre Royaume, considerant le scandale cy deuant aduenue en Allemagne & ailleurs, pour les occasions que chacun scait, & en fin que i'estois contrainct de luy dire, que si vostre Saincteté vouloit imiter Iesus Christ, duquel elle est vicaire, elle deuroit plustost aller rechercher les ames esgarees, pour les ramener en l'Eglise de Dieu, que non pas de chasser au loing celles qui s'y presentoiēt. A quoy il me fit responce, que Iesus Christ n'estoit tenu d'aller rechercher les desnoyez, ains 'au contraire qu'il auoit voulu que l'on s'adressast à ses disciples, pour les introduire à luy, comme les Gentils firent à saint André: auquel ie dis, qu'il prenoit saint André pour saint Philippes: mais que cet exemple-là estoit seul en l'Euangile: Et au contraire qu'il y auoit plusieurs autres qui tesmoignoient comme l'on s'estoit adressé tout droit à Iesus Christ,

voire que luy mesmes estoit allé chercher les pecheurs, pour les acheminer à la vraye cognoissance de Dieu, & de luy: mais puis que vostre Saincteté auoit pris ceste resolution, & qu'elle y vouloit persister, que ie n'auois que faire de la debatre dauantage: & seulement ie deplorois la misere qui aduiendroit à nostre France par la rage des soldats, qui estoit tres-grande: & encores plus grande parmy ceux de la Ligue, que non pas parmy les nostres, parce qu'ils portoient moins de respect aux Eglises, que ne faisoient noz soldats: lequel me fit responce en souzriant, qu'il ne sçauoit qu'y faire. Ce que, pour vous dire vray, Pere sainct, me toucha si fort au cœur, que ie fus contrainct de luy dire: Rions tous hardiment: Car dans peu de iours nous serons les premiers à gemir, & puis vous serez contraint d'en faire de mesme: Lequel fit excuse de tel acte, alleguant, qu'il auoit prou de regret des maux qui auient, mais qu'il desireroit les pouuoir empescher: & me sembla de voir lediēt sieur Cardinal vn peu arresté & pensif, sur les propos, que ie luy auois tenus. Ce qui me donna occasion de luy demander, s'il auoit

point charge de vostre Saincteté de me declarer les œuures preparatoires qu'elle entendoit que le Roy mon maistre fist, afin de l'acheminier à rendre contente vostre Saincteté de ses actions, & par icelles luy donner occasion de croire, que sa conuersion est bonne: Et en ce faisant, qu'il pleust à vostre Saincteté luy donner esperance de le receuoir au giron de l'Eglise de Dieu, comme aussi de luy donner cōseil, s'il iroit à la messe, ou non, & pareillement luy declarer vostre intention sur les expéditions des Bulles: lequel sieur Cardinal me dict, qu'il n'auoit aucune charge de vostre Saincteté de m'en dire aucune chose, parce que elle ne vouloit aucunement se souzmettre à donner conseil à Nauarre, ains le laisser faire de luy-mesme: mais que luy, comme Theologien, m'en diroit son aduis, duquel i'ay estimé ne deuoir faire estat, puis qu'il ne procedoit de vostre part: & suppliy seulement ledict sieur Cardinal de rapporter à vostre Saincteté ce que ie luy auois dit, comme il me promit de faire.

Ayant donc attendu iusques au 9. de ce mois la responce dudit sieur Cardinal de Toledo, & n'en ayant aucune, ie recogneus

fort bien que ie n'en aurois point d'autre, & que l'on desiroit de m'amuser, & possible se moquer de moy, selō l'aduis apporté de Paris par ledit sieur Montorio: ce qui me fit enuoyer le sieur de Niuolō vers Monsieur le maistre de vostre chambre ledit iour, pour supplier vostre Saincteté de trouuer bon que le Lundy i'allasse me licēcier d'elle, & luy baiser les pieds avec mon fils, & les Gentils-hommes qui s'en retournent en France avec moy, esperant aussi de m'esclaircir, si sa volōté & resolutiō estoit telle, que m'auoit rapporté ledit sieur Cardinal de Toledo, lequel fit responce audict sieur de Niuolon, qu'il en parleroit à vostre Saincteté, comme il fit, & le lundy matin m'enuoya dire, que l'apresdinee i'allasse trouuer vostre Saincteté, comme ie fis, où estant, ie luy dis, que m'ayant faict sçauoir ledit sieur Cardinal de Toledo, que vostre Saincteté ne vouloit me donner aucune responce par escrit, à cause qu'elle entendoit & vouloit que les lettres, memoriaux, & autres propos, que ie luy auois tenus, & baillez de la part de mon Roy, ne luy eussent esté tenus & baillez par moy de la part de sa maiesté, ains de la mienne seulement,

comme de propos familier, & par forme de discours: Et pource voyāt, que mon sejour en ceste ville ne pouuoit plus me dōner esperāce de rapporter meilleure expeditiō, que celle qu'il vous auoit pleu de me bailler, que ie m'estois resolu de m'en retourner en France rendre le deuoir, que ie deuois à mon Roy, & à ma patrie: & partāt que i'estois venu prendre congé de vostre Saincteté, luy declarant, que ie men allois fort bien content de la gracieuse façon de laquelle il luy auoit pleu de traicter avec moy pour mō regard particulier, mais tref mal content, voire avec vn desespoir incroyable de la rigoureuse & seueres resolution, qu'elle auoit faicte sur ce, que i'auois traicté avec elle, parce que ie pretioyis qu'elle apporteroit de sinistres accidens, & à la France, & ailleurs: Et cōme ie luy auois dit cy deuāt, i'ensse plustost desiré d'estre mort en la grace de Dieu, que de me voir reduict à vn effect si contraire à mon intention: mais puis que mon malheur n'y auoit acheminé, ie n'y pouuois faire autre chose, sinon de le prendre en patience: A quoy vostre Saincteté me respondit, qu'elle vouldroit auoir occasion de faire mieux

qu'elle ne faisoit, & de mettre la paix en France avec l'honneur de Dieu, & qu'es'il ne tenoit qu'à se faire couper les bras & les iambes, elle le feroit tres-volontiers: mais qu'elle ne voyoit rien qui la deust induire à faire ce, dont ie l'auois suppliee, & quand elle le verra, qu'elle le fera. Surquoy ie luy dis que ie pensois luy auoir cy deuât dit assez de choses, pour l'induire à m'accorder la tres-humble supplication que ie luy auois faicte: mais puis qu'elle n'auoit voulu y auoir esgard, que ie ne l'en importunerois dauantage: & suppliois seulement Dieu, qu'il luy pleust de l'inciter à prendre meilleure resolution, qu'elle n'auoit faite, & que ie m'en allois, & qu'il ne demeureroit icy ny Ambassadeur, ny Agent, ny Secrétaire, qui peust parler vn seul mot des affaires de la France. Tellement que ie voyois que vostre Sainteté seroit encores plus mal informée, qu'elle ne l'auoit esté par le passé, mesmes par Monsieur le Cardinal de Plaisance, du tout ennemy du Roy, & de nous, & partant que l'on la maintiendrait tousiours en telle haine & mauuaise opinion du Roy, & de nous tous, qu'elle y est, & luy feroiēt faire encores pis cōtre nous

de ce qu'elle a fait, & que le Roy auoit recogneu vne intelligence si grande entre ledict sieur Cardinal, & le sieur Patriarche d'Alexādrie Nonce de vostre Sainteté en Espagne, que tous deux estoient plustost ministres du roy d'Espagne, que d'elle mesme. Car chacun d'eux s'entendoit fort biē pour faire les affaires du roy d'Espagne, ainsi que sa maiesté me l'auoit mandé: & quant & quant enuoyay le coppie de la lettre dudit sieur Patriarche adressante audit sieur Cardinal, par laquelle il monstre la diligence, qu'il fait pour pourchasser la ruine de la France, à laquelle il employe l'autorité de vostre Sainteté, disant, qu'il ne se pouuoit faire plus grande poursuite enuers le roy d'Espagne pour l'affaire de la France, de ce que vostre Sainteté faisoit: ce que neantmoins sa maiesté n'a voulu croire, & luy baillay ladite copie tout ainsi qu'elle estoit venue de la France. Ce que ie recogneus auoir fait quelque alteration au visage de vostre Sainteté, comme ie cuide, pour auoir veu que ledict sieur Patriarche auoit fait chose mal seante à luy, & supplie Dieu, qu'elle descouure leurs actions telles qu'elles sont, afin

qu'il vous plaife d'y remedier. Vostre Saincteté print ladiçte coppie, & me dit qu'elle la verroit, & qu'elle n'oublieroit de faire tous bons offices, pour remedier aux affaires de la France: & que si elle enuoye quelqu'un de delà, elle luy donnera charge de parler à moy, & que ie denois m'asseurer qu'elle auoit tres-bonne intention de bien faire pour ledit Royaume, & que si ie luy escriuois, elle l'auroit agreable, & m'y feroit respōse: ce que ie l'asseuray de faire, & que ie seray biē aise d'auoir occasiō de luy escrire chose, qui luy doiue estre agreable.

Ces propos acheuez, mon fils vint baiser les pieds de vostre Saincteté, pour se licencier, auquel il vous pleut de donner vne croix d'or, avec quelques esmeraudes, dās laquelle estoient quelques reliques, & de la vraye croix, & aussi vn chapellet, qu'elle trouua bō au mesme instant de luy mettre au col, ce que ie n'osay luy commander de refuser, pōur ne donner occasion à vostre Saincteté de penser, que ie mesprisasse les choses saintes, & aussi que la valeur d'environ trois ou quatre cens escus dudict present, les reliques ostees, n'estoit tel, qu'il peust donner occasion à personne de croi-

re, qu'elle eust pensé me vouloir dōner tel contentement, qui peust aneantir le mescontentemēt tres-grand, que i'ay de la despesche, qu'il vous a pleu me donner:& apres que mōdit fils eut fait son deuoir, suruindrent les autres Gentils-hommes François, qui en firent de mesme, desirans de s'en retourner avec moy trouuer nostre Roy: Et apres eux, ie baissay les pieds de vostre Saincteté, pour luy rendre le dernier deuoir de mon voyage: Et en ce faisant, ie prins congé de vostre Saincteté, en intention de partir deux ou trois iours apres, comme ie fis.

Or, Pere saint, ayant pris congé de vostre Saincteté & perdu toute esperance de pouuoir retirer d'elle meilleure expeditiō que celle qu'elle m'auoit donnee, & me voyant reduit à rapporter au Roy mō seigneur, & à tous les bons François vne resolution si rigoureuse & seuerie qu'il vous a pleu de prendre sur mes tres-humbles & Chrestiennes supplications: Le me suis auancé de rediger par escrit le sommaire de ce qui est passé touchant l'affaire, pour lequel le Roy mon maistre m'a enuoyé à voz pieds, afin de dōner occasiō à vostre Sain-

Eteté de confiderer à loisir mieux que i'estime qu'elle n'a fait l'important de iceluy, & quant & quant d'y apporter quelque remede doux & gracieux, conuenable à vostre qualité, suppliant tres-humblemēt vostre Saincteté, de me faire ce bien que de m'aduertir si elle s'apperçoit que i'aye oublié à escrire chose qu'elle m'ait dit ou fait dire, & qu'elle desire que i'y adiouste: car ie luy obeiray de tres-bon cœur, estant d'ailleurs bien asseuré de n'auoir dit chose qui ne soit veritable, pour le desir que i'ay eu de représenter à vostre S^{te} la verité des affaires de nostre France, & de l'acheminer à l'embrasser comme ie l'esperois.

Pour ceste occasion donc ie supplay tres-humblement vostre Saincteté de ne trouuer mauuais, si outre ce que i'ay dit cy dessus, ie luy represente encores le traitement rude qu'elle a trouué bon de me faire, non seulement à la qualité de ma personne, mais à l'affaire qui m'auoit esté cōmis, afin de donner occasion à vostre Saincteté de confiderer comme le tout est passé, & cognoistre qu'elle a esté tres-mal cōseillée, & puis se resoudre plus volontiers à addoucir sa rigueur, qu'elle a eu agreable de me faire sentir.

Vostre

Vostre Saincteté se souuiendra donc, si luy plaist, du commandement expres, qu'elle m'a enuoyé faire à la Mouscha cinq iournees distantes de ceste ville par le Pere Pousséuin, de venir resolu en ceste ville, à n'y demeurer que dix iours, & depuis de celuy, qu'elle m'enuoya faire par Monsieur le Maistre de vostre chambre le huitiesme iour apres mon arriuee, de m'expedier vistement pour partir au plustost, qui faict paroistre qu'elle ne me restraignoit ce terme si court, sinon pour penser de me mescontenter, & donner occasion de ne venir en ceste ville, & puis y estant venu, qu'elle desiroit de m'en chasser au plustost, pour ne vouloir entédre à la tres-humble requeste que j'auois à luy faire de la part de mon Roy penitent: car l'on sçait assez, qu'en huit ou dix iours l'on ne peut quasi donner commencement à vn affaire de si grâde importance, tant s'en faut, qu'il se puisse expedier dans vn terme si court: Aussi ie diray, que l'on n'a iamais accoustumé de dōner vn temps si prefix, qu'aux ennemis, que l'on craint, qu'ils ne brassent pendant leur sciour quelque chose preiudiciable au lieu où ils sont. Ce que iuste-

H

ment l'on ne peut dire de moy, sçachant que ie ne suis venu trouuer vostre Saincteté, comme ennemy dudiect S. Siege & d'elle, mais pour l'honorer & faire receuoir en vostre bergerie pontificale vne brebis esgaree des plus excellentes de la Chrestienté, & tres-suffisante pour y en ramener apres elle vne quantité si grande que les forces du Roy d'Espagne & celles de la Ligue ensemblemēt ne le sçauroient iamais faire: & si i'ay seiourné plus long temps en ceste ville que les dix iours, i'en dois attribuer la cause à la goutte qui est suruenue à vostre Saincteté, & d'autres accidens & interruptions qu'elle a eu, & à la proposition que Monsieur Montorio, venu de Paris, a faicte de m'y amuser pour retarder mon retour pres du Roy mon Maistre, & non pas à la volonté de vostre Saincteté, par ce qu'elle n'a iamais trouué bon de me prolonger lediect terme de dix iours, quelque instante supplication que ie luy en aye peu faire par plusieurs & diuerses fois, le Dimanche xxj. le Mardy xxiiij. & Ieudy xxv. de Nouembre, & depuis fait supplier par lediect sieur Cardinal de Toledo, quand il m'est venu parler de vostre

part, comme j'ay dict cy dessus, dequoy ie
veux croire que vostre S^{ae} se ressouuenât;
elle aura regret de l'auoir faict par le cōseil
pernicieux de ceux qui pour plaire à au-
truy, desirent de ruiner la France, & possi-
ble au donmage de vostre Saincteté, &
du sainct Siege.

De mesme ie veux croire qu'elle n'ap-
prouuera non plus le cōmandemēt qu'el-
le me fist au mesme temps, & par le mesme
pere Poussuetin, que venant en ceste ville
i'y vinsse avec moindre apparat de com-
pagnie que ie pourrois, pour les raisons cy
dessus alleguées : car il semble qu'il deuoit
suffire à vostre S^{ae} de ne m'auoir faict ren-
contrer avec les honneurs accoustumez
aux Ambassadeurs des Roys de France, &
aussi de ne me donner le consistoire ac-
coustumé, sans me prescrire vne loy si ri-
goureuse & contraire à ma qualité: quand
dis-ie, ie n'aurois point le tiltre d'Ambas-
sadeur d'un Roy de France: Car elle eust
assez amplement tesmoigné à vn chacun
par tels actes, que son bon plaisir estoit de
ne me receuoir comme Ambassadeur. Et
au reste qu'elle ne vouloit m'empescher de
tenir & garder le rang qui iustement m'est

Discours de la Legation

deu , à cause de la maison d'ou ie suis yssu,
& que ie tiens en Frâce. Car le Pape Sixte
cinqüiesme, qui a acheminé vostre S^{te} au
Pontificat , par le chapeau qu'il vous dō-
na , ne vous a pas donné exemple de me
traicter de telle façon en la receptiō hon-
norable , qu'il fit à Monsieur de Luxem-
bourg venu le trouuer, non de la part d'un
Roy tres-Chrestien, mais des Catholiques
Royaux, qui seruoiet lors sa Majesté, non
dis-ie, pour luy apporter la nouuelle de sa
conuersion , mais seulement quelque ap-
parence. D'ailleurs Gregoire xiiij. n'a pas
aussi donné tel exēple à vostre S^{te} en la re-
ception tres-honorable qu'il fit aux Am-
bassadeurs du Moscouite , schismatique ,
voire heretique, qui le vinrent trouuer de
sa part , non pour le recognoistre vicaire
de Iesus Christ , ny luy rendre le deuoir
qui luy estoit deu, mais seulement pour le
requerir de l'assister à l'endroit du Roy de
Pologne , afin qu'il ne luy occupast l'autre
partie de la Liuonie , qu'il n'auoit encores
pris. Car outre la reception qu'il leur fit
d'Ambassadeurs, il escriuit en la faueur du
Moscouite audit Roy de Pologne, com-
me il l'en auoit prié , ores qu'il ne donnaist

aucune esperance à sa S^{at}é de se faire Catholique, ny recognoistre le sainct Siege.

I'adiousteray encores le refus que vostre S^{at}é a fait, de ne vouloir permettre à Monsieur le Marquis de Pizany, durant vn an tout entier, de venir luy baïser les piedz de la part de tant de Princes du sang Royal, & d'autres Princes, Seigneurs & Clergé qui assistent le Roy pour luy rendre tesmoignage de l'humilité & obeïssance qu'ils luy portent, & pour luy ouurir les moyens bons & faciles, pour effectuer la cōuersion de nostre Roy, laquelle deslors nous voyions fort preparee, & en ce faisant, vous rendre le vray pere commun de la France : & non contâte de n'auoir voulu escouter ledict sieur Marquis, durant vn si long temps, elle a esté poussee de luy commander, estant en chemin pour aller à Lorette, de sortir hors des terres de vostre estat, cōme fil estoit ennemy du sainct Siege, & non pas vn personnage plein d'honneur & tres-Catholique, comme il s'est fait cognoistre pour tel aux Ambasfades où il a esté employé en Espagne l'espace de dix ou douze ans, & en ceste ville cinq ou six. Ce que Perc sainct, ie vo^{us} lais-

se à penser, fil n'apportera pas grand des-
plaisir à tant de personages de qualité,
qui l'auoient delegué vers vostre Saincté-
té. Car on ne sçauroit dauantage mespri-
ser vne personne, que de ne la vouloir es-
couter, & en fin la chasser hors de ses ter-
res, sans luy en dire l'occasion. Si par aduē-
ture vostre Saincteté eust eu quelque mes-
contentemēt particulier de sa personne, il
eust esté plus à propos de le luy faire dire
dés le commencement qu'il vint en Italie
par Mōsieur le Duc de Mantouë mon ne-
pueu, que nō pas de le faire par son Altesse
persuader d'auoir patience, & declarer sa
commission, luy donnant par là esperance
de le receuoir; car il eust aduertty ceux qui
l'auoient deputé, du refus qu'elle faisoit de
le receuoir, afin qu'ils en commissent vn
autre en sa place, & le tout fust passé avec
quelque honneur: au lieu que l'ayant trai-
cté si rudement, l'on a pris argument de
croire, que l'on ne desiroit point qu'il vint
à Rome, pour declarer la verité, & contre-
dire les faulces impressions que l'on auoit
semé en ceste ville du Roy & de nostre
France, & qui estoient entrees bien auant
dans voz oreilles. Le pauvre pere Pouffe-

uin Iesuite, choisi par vostre Saincteté, d'entre tant de gens d'honneur, qui sont en ceste ville pour l'enuoyer au deuant de moy à me declarer voz volonte^z & intentions, a esté finablement contrainct de s'enfuir de ceste ville, pour vous auoir dit, & à aucuns Cardinaux partie des moyens que ie pretendois d'ouurir à vostre Saincteté, pour faciliter les affaires de nostre France, parce qu'il fut tenu pour vn politique, & du tout affectionné à mon Roy, puis qu'il n'exageroit contre luy, comme l'on vouloit qu'il fust, plustost que de faciliter la recõciliation de sa Majesté avec vostre S^{ae}, & remettre son royaume en paix, & euit^r tant de maux qui aduiendront.

Ie suis contrainct encores de représenter à vostre Saincteté le commandement qu'elle a faict faire à Messieurs les Cardinaux peu auparauant ma venuë en ceste ville, de ne me visiter, & qui pis est, de ne se laisser visiter par moy, comme si i'estois personne indigne de parler avec eux, ou excommunié. Ce que vostre Saincteté sçauoit fort bien le contraire, & qu'il n'y auoit taché en moy qui me peust empêcher de parler à eux. Neantmoins pour

Discours de la Légation

toutes les supplications que ie luy aye peu faire par diuerſes fois, ie n'ay iamais peu obtenir ceste grace & faueur de voſtre Saincteté, que de les viſiter en particulier & en general, comme i'en auois de mon Roy charge expreſſe, & lettres pour leur preſenter, afin de me congratuler avec eux de la conuerſion de ſa Maieſté, & les informer de ce qui eſtoit paſſé, & les ſupplier de l'asſiſter enuers voſtre Saincteté en cet affaire, ayant proteſté par pluſieurs fois à voſtre Saincteté que ie n'entendois point qu'elle donnaſt permiſſion auſdicts ſieurs Cardinaux de me viſiter, parce que ie ne recherchois point cet honneur. Car il ne ſe trouuera aucunement ſur les liures, ny par les traditions humaines, que l'on ait iamais empesché les parties d'informer les Iuges & Conſeillers des grands Princes qui doiuent aſſiſter au iugemēt de leur cauſe, comme Meſſieurs les Cardinaux doiuent faire les Papes en telles matieres ſi importantes, comme Conſeillers naiz du ſainct Siege, & leſquels à ceste occaſion ont leur demeure eſtablie en ceste ville pres d'eux: autrement leur reſidence ne ſeruiroit que pour teſmoigner les proui-

sions des benefices que les Papes donnent aux consistoires, & comme des Chanoines aux seruices solennels. Dont, Pere Sainct, ie ne puis me retenir de vous dire en toute humilité, que ie doute bien fort que tels refus ne donnent à penser qu'elle ne vouloit que l'affaire de mon Roy fust entendu par tels personnages d'honneur, accôplis de vertu, contre la coustume gardée au faict de la iustice, qui doit estre distribuee sincerement & droictemēt à chacun, & donne libre accez indifferemment à tous, pour la requerir, informer les Iuges, & plaider contre les plus grands Princes de la terre. Dieu a enseigné par le vieux & nouveau Testament les Iuges, comme ils doiuent se gouuerner en la distribution de la iustice.

Pareillement, ie feray ressouuenir à vostre Saincteté du refus qu'elle m'a faict de communiquer le memorial susdict à Messieurs les Cardinaux du sacré College, qu'elle cognoissoit auoir le iugement & l'ame bonne, & du tout eslongnee de passion & d'interest particulier en cet affaire, & à chacun d'eux respectiuement demander en secret leur aduis sur iceluy, pour

Discours de la Legation

leur donner plus de liberté & d'asseurance de le vous dire avec sincere conscience, & sans crainte de desplaire à personne, & puis en plain confistoire faire redire sommairement l'aduis de chacun, afin de vous en seruir & aider à trouuer le vray remede necessaire à noz maux, ainsi que de tout temps les Papes voz predecesseurs ont faict, voire en beaucoup moindre occasion que ceste-cy, pour le desir qu'ils ont eu de rendre leurs actions iustifiees à tout le monde, & de descharger leur conscience enuers Dieu, du iugement qu'ils donneroient. Ce que d'autant plus me sembloit que vostre Saincteté deuoit faire, parce qu'elle ne prenoit conseil que de Messieurs les Cardinaux des cōgregations de l'inquisition, & de France, la pluspart desquels se peuuent appeller plustost Aduocats & Procureurs du Roy d'Espagne, & de Mōsieur son Ambassadeur, que non pas Iuges & Conseillers de vostre Saincteté en cet affaire, parce qu'aucuns sont naturels Espagnols, autres, subjects tres-affectionnez du Roy d'Espagne, autres, obligez à sa Majesté Catholique, par pensions qu'ils ont de luy, & quelques vns le

recherchèt bien fort pour l'esperāce qu'ils ont d'estre faiçts Papes par sa faueur, reconneuë maintenant en ceste ville seule, & omnipotente en tout. Et pour mieux cōfirmer mon dire, j'ay dit à vostre Saincteté, & est vray, que pour le moins vne demie douzaine de Cardinaux, apres auoir assisté vostre Saincteté à dire tant deuotement, cōme elle fit, la grand' Messe le iour de Noël, à laquelle mon ame receut beaucoup de contentement, si tost qu'ils furent sortis de table, allerent visiter Madame l'Ambassatrice d'Espagne, au lieu d'aller à Vespres, au visiter les lieux sainçts, comme la iournee deuotieuse le requiert, & l'exemple tres-picux que vostre Saincteté leur auoit donné le matin. Neantmoins vostre Saincteté n'a trouué bon d'accorder aucunemēt ma demande, disant qu'elle n'estoit tenuë de communiquer au College de Messieurs les Cardinaux, sinon ce que bon luy sembloit, & qu'elle ne se vouloit conseiller, sinon à ceux qu'il luy plairoit, & finalement qu'elle ne vouloit s'assujettir à demander aduis qu'à ceux qu'elle iugeroit à propos, attendu qu'elle seule auoit à respondre deuant Dieu de ses

actions, ainsi que depuis elle l'a déclaré au Consistoire qu'elle tint le Lundy xx. du passé, trouuant fort mauuais qu'il y eust eu quelques vns de Messieurs les Cardinaux qui se fussent plaints, dequoy elle ne leur communiquoit cet affaire si important. De sorte que ie n'ay pas grande occasion de m'estonner si la responce qu'il vous a pleu de me faire a esté rigoureuse & seuerre, estant procedee d'un conseil si passionné, mais bien que vostre Saincteté l'ait fait telle, ie doute bien fort que tel refus ne donne matiere à plusieurs de croire que l'occasion qui a retenu vostre Saincteté, de vouloir qu'autres que les susdicts Cardinaux prinsissent cognoissance de cet affaire, & luy en donnassent aduis, a esté parce qu'elle n'estimoit les autres Cardinaux capables à vous donner conseil en affaire de si grande importance, ou bien que vostre Saincteté craignoit qu'ils la persuadassent de faire autremét de ce qu'elle auoit desia resolu avec ceux des deux congregations, & promis à Monsieur l'Ambassadeur d'Espagne auparauant mon arriuee en ceste ville, cōme ie le diray cy apres, & par consequent qu'elle soit tellement enuelopee

& detenuë en subjection par ceux qui des-
furent la ruine de la France, qu'elle ne puis-
se faire ce que par son bon naturel elle fe-
roit si elle estoit libre de telle subiection.

Et d'autant plus le croiront lors qu'ils
sçauront l'instance supplication & pour-
suinte que j'ay faicte à vostre Saincteté, de
demander aduis sur tel affaire à l'Empe-
reur & aux autres Princes de la Chrestien-
té, pour rechercher le vray moyen pour
remedier à tels malheurs, & qu'elle ait
trouué bon de rejeter vn conseil si sage &
prudent qu'est celuy desdicts Princes &
Cardinaux, esloignez d'intrest particu-
lier, consommez & experimentez à ma-
nier grands affaires d'Estat, pour se tenir
seulement à celuy desdits Cardinaux pas-
sionnez, estimant que si vostre Saincteté
eust désiré d'assoupir noz guerres ciuiles,
& euit la suite de tant de maux qu'elles
ameinent, elle eust recherché l'aduis des-
dits sieurs Princes & Cardinaux, & d'au-
tres encôres plustost que de le rejeter. Et
en ce faisant vostre Saincteté eust euité le
le doute qu'elle m'a quelquefois dit auoir
de s'entremettre en noz affaires, pour
crainte de faire chose contraire à son ac-

tente, & preiudiciable à son ame. Car ie croy fermement qu'elle eust trouué l'vni- que remede à noz maux, comme l'expé- rience le nous appréd, parce que tant plus vn affaire important est consulté parmy les esprits excellens, il fescclaircit dauan- tage : tout ainsi que faiët le miel iaulne quand il est beaucoup agité. Je ne puis cer- tainement croire que si vostre Saincteté voyoit de ses propres yeux l' demolition de plusieurs beaux & grands monasteres qui se fait, & le desordre qui s'engendre tous les iours plus parmy les Ecclesiasti- ques, qu'elle en auroit horreur, & que le cœur luy fremiroit de voir tant de cures abandonnees par leurs Curez: & par con- sequent tant de peuple Catholique desti- tué des sacremens de l'Eglise, & de l'in- struction spirituelle qu'ils doiuent auoir pour les maintenir en la cognoissance de Dieu, dont la pluspart demeureront forciers, & meurent damnez: & non seulement tel- le perte sera de trois ou quatre personnes; mais de beaucoup de millions d'ames qui sont maintenant Catholiques : car la rage des soldats, mesmes estrangers, est si gran- de, qu'elle les induit à faire toutes sortes

d'impietez qui se peuuent imaginer non seulement contre le pauvre peuple, mais à l'endroit des gens Ecclesiastiques, voire de leur party. Je ne sçay si telles ames damnees n'accuseront en plain iugement deuant Dieu ceux non seulement qui sont cause de leur damnation : mais aussi ceux qui auront presté consentement pour n'auoir voulu y apporter le remede qui estoit en leur pouuoir. C'est pourquoy, Pere Sainct, ie croy que quand vostre Saincteté aura bien consideré la proposition que ie luy ay faicte, elle aura regret de ne l'auoir embrassée, & sera faschee contre ceux qui l'auront retenu de ce faire. Et puis que ie suis sur tel propos, ie ne puis me retenir que ie ne die à vostre Saincteté, qu'il a esté trouué fort mauuais en France que l'on ait escrit à Monsieur le Cardinal de Plaisance, & au sieur Duc de Feria qui sont à Paris auparauant mon arriuee en ceste ville, qu'ils ne se donnassent point de peine de ma venuë à Rome, parce que mon séjour y seroit fort court, & que ie ne rapporterois aucune resolution sur l'absolution de nostre Roy, & qu'ils en asscurassent ceux de la Ligue, afin qu'ils ne pris-

Clement ses predecesseurs, sous lesquels grande partie de la Germanie & l'Angleterre se sont distraicts de la recognoissance du S. Siege : mais ie cognois bien m'estre grandement abusé, & m'en desplaist.

Quant à mon particulier, ie vous proteste, Pere Sainct, que ie ne veux aucunement me tenir offensé de toutes les indignitez qu'il vous a pleu de me faire, bien qu'elles ayent esté tres-grandes, parce que j'ay recogneu qu'elles ne protienoient de vostre bon naturel, ains du conseil tres-pernicieux qui vous a esté donné de m'espieter, pour me donner occasion de resoudre par moy-mesme de ne venir en ceste ville selon que le disiroient Monsieur l'Ambassadeur d'Espagne, & les députez de la Ligue, & qu'ils vous en ont supplié, ne pouuans croire que i'eusse resolu d'y venir, si la force ne m'en empeschoit, ny que i'eusse le courage si grand de me resoudre à supporter les indignitez & affronts que l'on me feroit, comme j'ay faict pour tascher à surmonter toutes les difficultez qui s'opposeroient à moy pour esclaircir & reduire à bon port l'affaire que j'auois à traiter avec vostre Saincteté. Et pource ayât

recoigneu que tout cela procedoit du naturel tres-mauuais de ceux qui taschent de violenter le vostre bon, j'ay voulu de propos deliberé supporter le tout, & me ranger pour ce regard à voz commandemens, mesme parce que j'ay tousiours estimé que tant plus ie serois humble en vostre endroit, & qu'elle me rudoyeroit, & que ie l'endurerois, cela seruiroit à iustifier d'auantage, tant à l'endroit de mon Roy, qu'à la France, que ie ne serois cause que vostre Saincteté me donneroit vne si rigoureuse & seuerie despesche. D'ailleurs aussi tesmoigneroit à vostre Saincteté & à toute la Chrestienté l'obeissance & humilité que mon Roy penitent m'a commandé de porter pour luy à voz commandemens. Ce qui, Pere Sainct, m'a induit pendant mon sejour en ceste ville d'y demeurer si priuément qu'elle le desiroit, pour ne luy donner occasion de se plaindre de moy, dont ie puis dire avec verité auoir esté par les rues aussi simplement, que fait vn Gentil-homme de petite qualite, & dans mon logis sans aucune visite, à cause que chacun craignoit de desplaire à vostre Saincteté. Et pour ce n'y sont pas seu-

lement venus ceux qui sont grandement obligez à la Couronne de France, & diray encores à moy, pour leur auoir fait plaisir. Les Minimes de la Trinité, qui sont la pluspart François, n'ont osé me receuoir la veille de Noël dans leur enfermerie; pour y faire mes deuotions, comme i'estois accoustumé de faire en leur couuent pres Paris, parce que leur vicaire general Neapolitain suscitè comme ie cuide par aucuns Religieux Espagnols, que l'on a depuis mis par force dans ledict couuent, contre les priuileges d'iceluy (pour estre destiné seulement aux François) ne le voulut permettre, & vint luy-mesme me le declarer: Dequoy neantmoins ie n'ay voulu m'en plaindre à vostre Saincteté, de crainte de l'importuner. Ce qui vous doit faire cognoistre l'humilité & le respect que ie luy ay porté, & de mesme pourra faire monsieur le maistre de vostre chambre, en ce que pour obeïr au commandement qu'il me fit à la deuxième audience du Ieudy xxv. Nouembre, d'amener avec moy fort peu de Gentils-hommes François, ie n'introduisis avec moy que deux Prelats Italiens residans en ceste

ville au lieu de quelques soixante dix Gē-
tils-hommes François, qui en la préce-
dente audience estoient venus avec moy
pour se faire cognoistre bons seruiteurs de
nostre Roy. Et neantmoins j'ay bien reco-
gneu que tel commandement ne fut pas
fait à Monsieur l'Ambassadeur d'Espagne
le Samedi ensuiuant: car il amena, après
luy, allant à l'audience, soixante dix caros-
ses, pour penser de me faire vne brauade à
l'Espagnolle, au lieu de dix ou douze qu'il
souloit y amener. Toutes lesquelles cho-
ses, ie doute, Pere Sainct, ne soient trou-
uees gueres bonnes par ceux qui conside-
reront la personne que ie represente, &
l'importance de l'affaire pour lequel i'e-
stois venu, dequoy pour mon particulier
ie ne veux m'en tenir offensé, ains obligé
de l'honneur qu'il vous a pleu de me faire
pendant mes audiences, ayant voulu trai-
cter avec moy de telle humanité & dou-
ceur qu'elle pourroit faire avec Messieurs
ses propres nepueux, & me faire tant d'of-
fres qu'elle a faictes, accōpagnées des lan-
gages honnestes qu'il vous a pleu non seu-
lemēt de me tenir, mais à plusieurs autres,
avec beaucoup de propos fort hōnorables

pour moy. Et en fin de m'auoir fait visiter par Messieurs les Cardinaux voz nepueux apres m'estre licentié de vostre Saincteté, dequoy ie l'en remercie tres-humblemēt.

Comme aussi d'auoir trouué bon de n'adiouster foy aux impostures que Monsieur le Cardinal de Plaisance vous a escrit de moy en Aoust dernier, disant en premier lieu, qu'il m'auoit conuié de parler à luy lors que i'estois à saint Denis, & que ie ne luy auois fait aucune responce. D'ailleurs que i'auois fait prédre à Nevers toutes les lettres qui n'estoient paruenues en voz mains, & en ce faisant auoir rejecté son pernicieux dessein, qui estoit de me rendre par telles impostures si odieux à vostre Saincteté, qu'elle prist sujet de ne me voir ny escouter, & par consequent de m'oster le moyen de vous declarer la verité des affaires de nostre France, & les comportemens dudit sieur Cardinal. Et par mesme moyen de me iustifier de ses calomnies, comme ie pense auoir fait, ayāt fait entendre à vostre Saincteté, que sur la propositiō que ledict sieur Cardinal m'en-uoia faire de parler à luy, ie fis responce, avec la permission du Roy à Monsieur de

Chanualon honnesté Gentil-homme de leur party, & grand amy dudit sieur Cardinal, que i'estois contét de retarder mon partement de sainct Denis, iusques au soir pour parler à luy aupres de Paris, ou i'y-rois, lequel sen retourna trouuer ledict sieur Cardinal, & puis m'escrui de sa part qu'il ne pouuoit me voir, lequel i'estime rompit son dessein de me voir, quād il entendit par ledict sieur de Chanualon, que fil ne desiroit de parler à moy pour autre chose que pour me diuertir de venir me rendre à voz piedz, il n'auoit que faire de sincommoder: & se resolut de me calomnier pour penser de m'oster le moyen de baiser les piedz de vostre Saincteté, & en ce faisant obtenir son intention. I'ay representé à vostre Saincteté la propre lettre que m'a escrit ledict sieur de Chanualon, afin de luy iustifier mon dire, & la calomnie dudit sieur Cardinal. Je pèse aussi auoir suffisamment verifié à vostre Saincteté le contraire de ce qu'il vous a escrit, touchant lesdictes lettres interceptes pour vous auoir faiet cognoistre que ledict sieur Cardinal, sçachant fort bien que la ville de Neuers est en l'obeissance du Roy, &

qu'il y a garnison payee par sa Majesté, il n'est pas vray-semblable qu'apres auoir recogneu que l'on luy auoit pris deux ou trois de ses pacquets passant par ladiete ville, il ait voulu continuer à y faire passer les autres, ains qu'il aura faict tenir autres chemins à ses messagers pour aller à Lyon ou en Lorraine, pour les porter seurement, ainsi qu'il se peut faire, & que la verité est qu'il a faict: dequoy il m'a semblé que vostre Saincteté en demeura esclaircie, & d'ailleurs contente de moy, & que par là elle a peu cognoistre que ledict sieur Cardinal ne m'ayme gueres, me calomniant si estrangement en vostre endroict, sans luy en auoir dōné occasion, si ce n'est pour m'auoir recogneu autant enclin à conseruer la Couronne, que luy est à pourchasser sa ruine: dequoy i'espere au moins tirer tel profit, que recognoissant vostre Saincteté l'animosité que ledict sieur Cardinal Segas a en mon endroict, elle n'adiousterà plus de foy à ce qu'il vous escrira contre moy, pour penser de me fier les bras, les iambes & l'honneur, ainsi que i'ay recogneu qu'il en a la volonté, ayant cy deuant escrit à vostre Sain-

Eteté au mois d'Auril dernier, que Monsieur de Guise m'auoit faict fuir depuis Chably iusques à Neuers, distant de trente lieues, lors que j'allay expressement le trouuer au commencement dudit mois d'Auril, pres de ladicte ville de Chably, pour luy offrir la bataille, auquel temps il fut contraint de se retirer à la faueur de ladicte ville, & le lendemain d'aller à Auxerre, distant de sept lieues de là, & puis à Troyes, ainsi qu'un chacun l'a veu & cogneu, parce qu'à la verité il n'auoit lors les forces esgales aux miennes, & croy que si les eust eues, qu'il ne se fust retiré si loing, pour estre Prince valcureux. Enquoy vostre Saincteté peut cognoistre que ce que ledict sieur Cardinal vous a escrit contre moy, prouient de propos deliberé, puis qu'il sçait qu'il vous a escrit le cōtraire de la verité. Et de mesme, ie croy qu'il faict encores tous les iours, à l'endroit de ceux qu'il n'aime point, & qu'il desire de ruiner en vostre endroit, comme il faict non seulement Messieurs les Princes du sang & tous les Catholiques qui seruent le Roy, mais sa Majesté, ainsi que par autres lettres qu'il vous a escrit, l'on l'a

recogneu, n'ayant tenu à luy que vostre Saincteté n'ait exclus Messieurs les Princes du sang de la succession de la Couronne, & excommunié tous les Catholiques qui seruent le Roy: ains à la prudence de vostre Saincteté, qui luy fit responce au mois de May dernier, qu'elle ne trouuoit bon ny l'un ny l'autre, & aussi peu d'autres propositions qu'il vous auoit faictes.

Et puis que j'ay recogneu son mauuais naturel, ie ne veux obmettre de faire ressouvenir à vostre Saincteté l'aduertissement qui m'a esté donné, que ledict sieur Cardinal Sega auoit déclaré à Paris au mois de Iuillet dernier, que l'intention de vostre Saincteté estoit, que Monsieur de Guise fust Roy, & pour le faire croire, qu'il presenta certain escrit qu'il disoit venir de vostre part: car ie ne pouuois croire qu'elle eust voulu violenter l'eslection des deputez de leurs Estats par vne simple proposition: ce que ie trouuay estre veritable, parce que vostre Saincteté me fit respōce qu'elle ne pouuoit croire qu'il se fust tant aduancé que d'employer vostre nom en chose de laquelle il n'auoit aucune charge, & festonnoit de telle nouuelle, comme à la ve-

rité elle en eut occasion, & croy qu'elle feroit fort bien de l'oster de là au plustost, pour n'estre aucunement propre pour effectuer l'intention bõne que vostre Sainteté dit auoir de conseruer la religion & la Couronne entiere, ou à tout le moins ne luy adiouster plus de foy, comme ie la supplie tres-humblement en ce qu'il luy escrira du Roy & de nous tous, comme ennemy qu'il s'est par trop déclaré contre nous, & diray cela, sans qu'il luy en ait esté donné aucune occasion. Vostre Sainteté se souuiendra aussi, sil luy plaist, de ce que ie luy ay dit, n'auoir iamais refusé de parler aux ministres des Papes voz predecesseurs, par les bons & licites moyens, ainsi que les lettres que ie leur ay escrites, & celles qui m'ont esté responduës par Messieurs les Cardinal Caietan & Landrian, que i'ay pres de moy, en font ample foy. Toutes lesquelles choses i'ay estimé deuoir laisser par escrit à vostre Sainteté, afin de luy faire ressouuenir de la verité contraire aux impostures qui vous ont esté donnees, & quant & quant pour luy rafraischir la memoire de l'obligation que ie ressens de luy auoir, pour les choses

iusdiâtes: & desirerois tres-volontiers, Pere saint, qu'il vous pleust de m'obliger autant en l'affaire de mon Roy, pour lequel ie suis venu me rendre à voz piedz: car ie ne me trouuerois au desespoir auquel ie suis reduict. Lequel, Pere saint, me contrainct de supplier tres-humblement vostre Sainteté, pour fin de cet escrit, de vouloir addoucir sa rigoureuse & seuer resolution, & m'obliger tellement à elle, que ie puisse dire d'y estre presque autant obligé qu'à mes pere & mere, lesquels, fils m'ont donné l'estre en ce monde, ie n'y reçois que miseres, entre lesquelles ceste-cy est des plus grandes que i'aye iamais eües: mais si vostre Sainteté me fauorise tant que de m'accorder la tres-humble requeste que ie luy ay faicte pour le Roy mon Maistre penitent, & si affectionné qu'il est en vostre endroict: Le pourray à iuste cause dire qu'elle m'aura tiré de ceste misere, & acheminé à meriter la vie éternelle pour les grands biens qui en aduiendront.

Donques, Pere saint, recognoissez ie vous supplie tres-humblement qu'estes le vray vicaire de Iesus Christ, qui est descé-

Discours de la Legation

du du sein de Dieu son pere expressément pour venir rappeler le genre humain à la cōuersiō, & pour payer la debté de sa faute & peché, qui est proprement faire la penitēce de nostre forfait. Il n'a seulemēt trouué bon de ieusner & endurer grandement en ce mōde, mais en la fleur de son aage voulut estre tourmenté, & en fin crucifié & mis à mort par ceux lesquels il estoit venu pour sauuer de la damnation eternelle, & pour lesquels au plus grand tourment de son mal il pria Dieu son pere qu'il leur pardonnast la faute qu'ils faisoient. Qui vous doit, Pere sainct, donner exemple, non de vous faire crucifier & endurer vne seule douleur pour receuoir ceste brebis si penitente en vostre bergerie, ny moins l'aller rechercher trois pas de vostre hostel, mais seulement vous esmouuoir à compassion à la clameur de sa voix tremblante, qui incessamment crie comme j'ay faict pour elle, & vous supplie en toute humilité les genoux à terre, les mains iointes, les larmes aux yeux, toute esmeuë & dolente, de la vouloir receuoir en l'Eglise de Dieu, à fin qu'elle puisse participer à ses tresors, & ce par le merite du precieux sang espendu.

par le Sauueur en l'arbre de la Croix, autant pour luy que pour vous, & en ce faisant luy donner le moyen de faire le salut de son ame.

Souuenez-vous, Pere saint, de la ioye que les Anges font sur la conuersion du pecheur, & partant assistez-les en telle action. Souuenez-vous, Pere saint, qu'un homme peut grandement alterer les affaires de la religion Catholique, & un homme les peut pareillemēt redresser, comme l'on en a veu plusieurs exemples. Ce Prince a grand suite apres luy, & peut beaucoup pour l'augmentation de la religion Catholique. Souuenez-vous, Pere saint, que l'occasion est chāue, & qu'une chose faite à temps & à propos profite beaucoup plus qu'estant faite apres, & que maintenant il est en voz mains de faire vn œuure des plus grands qui se puisse faire en ce temps. Ce que paraduēture aurez cy apres regret de ne l'auoir effectué. Les guerres & troubles de nostre France ont eu quelque repos par la trefue que le Roy mon Maistre a accordé à ceux de la Ligue, mais si la guerre continuē il y a danger qu'elle n'apporte beaucoup de ruine au peuple inno-

cēt, & du desordre en la religion Catholique. Souueniez-vous, Pere S^r. du deuoir de bon Pasteur, & de l'hōneur que vostre S^{te} acquerra, dōnant la paix & repos à ce grād Royaume. Souueniez-vous, Pere S^r. que c'est vn Prince tres-Chrestien, yssu de la genereuse race S. Loys, Roy du premier Royaume de la Chrestieté, & que ses predecesseurs ont plus aidé & secouru les Papes, & le S. Siege q̄ tous les autres Princes de la Chrestienté, voire ie diray qu'ils ont grandemēt accōmodé les Papes voz predecesseurs en terres de grāde importance, en dignité & choses precieuses, au lieu que d'autres ont arraché du S. Siege de fort belles & honorables Prouinces, & les tiennent encores à son mespris. Souueniez vous, Pere S^r. que ce grād Royaume & tāt de bōs Catholiques qui y sont, ne meritēt d'estre mesprisez par vostre S^{te}. Ie luy en ay dit cy dessus les raisons, qui me gardera de les redire: mais seulemēt ie vous supplie tres-humblemēt de croire que fil ne plaist à vostre S^{te} de receuoir à penitēce nostre Roy, elle tesmoignera à nous tous, qu'elle nous desdaigne, voire qu'elle pretend de nous accabler: ce qu'elle ne pourra faire, &

neantmoins nous pouffera à nous precipiter, & à faire ce qui n'a peu encores entrer en noz cœurs : car ceste Noblesse & peuple est tres-Catholique & genereux, & ne souffrira patiemment de voir que vostre S^{ae} differe de recevoir nostre Roy à penitence, croyant que ce soit par l'advis & conseil de ceux qui desirēt la ruine de la France, & que pour leur plaire elle ne vueille y donner la paix, ains qu'elle desire que la guerre cōtinuē, pour leur donner moyen d'assouvir leur ambition. Chose qui les pourra possible induire à faire quelque acte contraire à vostre volonté, qui vous déplaira & à ceux qui ont pris possession de la conseiller : & si elle ne le faict, elle sera retenuë par l'affection & zele que le Roy mon Maistre a à l'endroit du S. Siege. Vostre S^{ae} sçait fort bien, que tandis qu'une porte est sur les gōds, elle se manie aisément pour grāde qu'elle soit, mais en estat hors, est tres-malaisé de la remuer, & tres-difficile de la remettre en son lieu. L'exemple de tant de Prouinces de l'Asie, Afrique, Europe, & de la religion Grecque en font ample foy, sans que ie les particularise. Il vaudroit beaucoup mieux que l'on exter-

minast tout en vn coup tant de Noblessè
& peuple Catholique qui seruent le Roy
à conseruer la Couronne & la Religion,
que nō pas de les mal traicter: car vn cœur
noble qui se sent offencé sans occasion, ne
peut facilement l'endurer. Si donc vostre
S^{ae} n'a le moyen de ce faire, ie la supplie
tres-humblement de prendre quelque au-
tre meilleur expediēt, afin de terminer les
guerres en nostre Royaume: car tous les
nobles & peuples de tous costez vniuer-
sellement le desirent, sans vous arrester au
dire des babillards, qu'il soit au pouuoir
du Roy d'Espagne, & de ceux de la Ligue
de chasser nostre Roy, & tant de person-
nages d'honneur qui le seruēt. Car ils vous
trompēt, & desirent seulement de vous en-
uelopper pour vous faire acheuer de vui-
der le tresor que Sixte V^e. a assemblé, cō-
me Gregoire XIII^e. y a tresbien cōmen-
cé, ayant despencé quinze cens mil escus
fort inutilemēt, cōme chacun le sçait, sans
qu'il en ait esté rēdu aucun cōpte, cōme il
deuoit desia auoir esté fait. Cōsiderez, Pe-
re S^r. que cet affaire est des plus grands qui
soit aduenū en la Chrestienté depuis l'eue-
nemēt de Luther. Souuenez vo^r, Pere S^r.
que

que les Papes voz predecesseurs ont assemblé des Conciles generaux pour beaucoup moindre occasiō que ceste-cy. Souuenez vous, Pere Saint, que voz predecesseurs ont enuoyé iusques au Leuāt & Ponāt pour rechercher les Princes desuoyez de la religion, afin de les ramener à l'Eglise de Dieu. Souuenez vous, Pere Saint, que Iesus Christ n'a iamais refusé aucun penitent venant à luy, ains est allé au deuant de luy pour le ramener. L'exēple entre autres de la Samaritaine, que i'ay allegué à vōstre Saincteté, en faiēt ample foy.

Or, Pere Sainct, ce grand Prince & belliqueux qui n'a oncques craint les forces du Roy d'Espagne vnies avec celles de Gregoire quatorziēme, vōstre predecesseur, ny de messieurs de Sauoye & de Lorraine, ny de plusieurs rebelles de son Royaume, auquel dis-ie les coups de canō, d'harquebuses, lāces, piques, & espees, ne luy ont iamais faiēt peur, ny l'image de la mort faiēt aucune apprehension, comme les hazards infinis auxquels il expose iournellement sa vie, en font ample foy, vient maintenant de si loin en toute humilité se prosterner à vos pieds, pour vous rēdre tout l'hōneur &

obeyssance qu'il vous doit, vous suppliant tres-humblement comme le vicaire de Iesus Christ, qu'il recognoist, de luy departir les tresors de l'Eglise, & voz commandemens, lesquels il est tout prest d'effectuer pour faire le salut de son ame. Ce courageux Prince ne s'est point flechy à ce faire, pour doute de ne pouuoir surmonter ses ennemis: mais il y a esté acheminé par le zele Chrestien que Dieu luy a imprimé dans son cœur: Car sa conuersion n'a esté faite par force, mais de bonne volonté & par deuotion, d'autant que lors il estoit victorieux sur ses ennemis par la prise qu'il venoit de faire de la ville & chasteau de Dreux, qui apportoit grād secours à la ville de Paris, sans que l'armee Espagnole & de la ligue ensemblement ayent eu la hardiesse de s'approcher de luy, pour penser de luy faire leuer le siege qu'il a tenu l'espace de six semaines. D'ailleurs l'armee Espagnole s'estoit retirée durāt ce temps de delà la Somme, & depuis se mutina, & se deffit d'elle mesme en Arthois vers la fin du mois de Iuillet, auquel tēps sa Maiesté alla à S. Denis, & y fit aussi approcher la siēne, pour empescher qu'aucuns viures n'en-

traissent dans Paris, qui engendra vne grande clameur dans ladicte ville, laquelle fust desia rendue à sa Maiesté, s'il n'eust trouué bon d'vser d'vn acte genereux enuers elle & tous ses pauvres & affligez subiects, par la trefue qu'il luy pleust accorder, afin de leur tesmoigner, que comme il se reconcilioit avec Dieu & nostre mere sainte Eglise, par le moyen de sa conuersion, que il vouloit aussi leur donner exemple par telle douceur & humilité d'en faire de mesme en son endroit. De sorte qu'il se void clairement que sa conuersion n'a esté forcee ny violentee, ains prouient de son propre mouuemēt. Ce Prince valeureux, Pere Sainct, n'a point encores esté Dieu mercy battu par ses rebelles, ains au contraire les a tousiours battus.

D'autre costé i'ay dit à vostre S^{te}, que ie l'asseurois sur mon honneur, que la conuersion de sa Maiesté estoit bonne & non feinte, l'ayāt recognuë pour telle lors que sa Maiesté me cōmanda expressement d'en assurer vostre S^{te}. Car s'il eust eu autre intention, ie m'assure qu'il eust choisi toute autre personne q̄ moy pour me faire estre ministre d'vne mēteric de si grāde impor-

tance & preiudiciable à mon honneur & à mon ame. Et partāt qu'il me sembloit que vostre Saincteté deust adiouster autant de foy à mon dire qui n'estoit nullement passionné pour mon particulier interest, qu'à celui des susdicts, qui ne prouenoit que de l'ambition qu'ils auoient & desir de la ruine de la France. D'auantage i'ay supplié vostre Saincteté de me coter les actions que l'on luy auoit dit que sa Maiesté auoit faict contraires à sa conuersion, m'offrant de les vous iustifier: ce qu'il ne vous a pleu de me dire, dont i'ay esté grandemēt marry, m'estant aduis que vostre Saincteté ne pouuoit moins que de me dire ce que l'on disoit de sa Maiesté pour l'en iustifier, ou ne le pouuant faire à bonne & iuste cause, n'adiouster foy à l'aduertissement qui vous en auroit esté donné. Toutesfois estant aduerty que l'on vous auoit produit certains articles qui ont esté traictez à Niort au mois de Septembre dernier, pour pēser de s'en seruir à tel effect: ie les produisis moy-mesme, pour vous faire cognoistre que les Huguenots tesmoignent la conuersion du Roy estre tresbonne, puis qu'ils desirent d'asseurer leurs affaires, & auoir vn Prince

particulier qui eust soin d'eux . D'ailleurs ie luy ay aussi offert de luy faire voir le serment solemnel que sa Maiesté pretend faire à son sacre & couronnement , & baillé celui de l'ordre du Saint Esprit , afin que elle iuge par là le lien auquel le Roy mon Seigneur se mettoit , & prinst par là occasion de croire que sa conuersion fust bonne , & en ce faisant le recevoir pour vray penitent. I'ay offert à vostre Sainteté de signer de mon propre sang les assurances que ie luy donnois , que mon Roy effectueroit de tout son pouuoir les commandemens qu'il vous plairoit luy donner pour penitence de son peché , & pour plus grande caution, ie luy ay aussi offert mon fils vnique en ostage , pour le tenir prisonnier dans vostre Chasteau de Saint Ange , lequel ie vous dis , ores que i'honore grandement sa Maiesté , que ie ne voudrois l'agrandir pour la ruine de mon cher enfant , comme ie ferois si ie n'estois plus que tres-assuré de sa bonne volonté. Aussi que ie recognois fort bien que le Royaume de France est composé de grand nombre de villes fortes, tout autrement que ne sont ceux d'Angleterre &

Escoffe, & d'autres, qui rendroit difficiles les changemens que l'on y voudroit faire. Partant ie supplie tres-humblemēt vostre S^té de ne vouloir tant s'arrester aux doutes que l'on luy faict de l'intention de nostre Roy, qu'elle differe d'ēbrasser les choses certaines & asseurées que ie luy ay deduites, & retarde à recevoir nostre Roy penitent, iusques à ce que l'Ange, auquel elle se remist, soit descendu du Ciel pour vous dire en l'oreille que sa conuersiō soit bonne: car il est à craindre que l'on ne pense que vostre Saincteté se remette expressément à chose impossible, afin de ne le recevoir, parce que Dieu n'a accoustumé d'enuoyer ses Anges pour occasion si claire & notoire à chacun: *Quia habemus Moysen & Prophetas*. C'est à dire que Iesus Christ vous a suffisammēt enseigné par sa doctrine ce que vous auez à faire, sans vous remettre à recevoir de luy des miracles: aussi qu'il me semble vous auoir allegué prou de raisons pertinentes pour vous faire croire que sa conuersion soit bonne, & faite volontairement: Et d'ailleurs que l'on doit croire plustost le bien que le mal. Et si vostre Saincteté persiste en son opinion, ie

croy que son ame s'affligera à toutes heures qu'elle entendra les nouuelles des sacrileges, violemens, meurtres & ruines qui seront perpetrees sur le pauvre & innocent peuple Catholique, Monasteres & gēs Ecclesiastiques, & aura tres-grand regret & desplaisir de penser d'en estre tenu pour n'auoir voulu s'entremettre à les empêcher, comme elle peut faire s'il luy plaist. I'ay appris q̄ bien souuent les Princes souverains sont cause par leur peché de faire souffrir le peuple, comme fit Dauid. Vostre Sainteté scait fort bien & mieux que moy, combien le peché d'obmission est grand, mesmes à l'édroit des Princes, & surtout du Pape, & en affaire de telle importance qu'est cestuy-cy.

Pour conclusion, Pere Saint, est-il possible que vostre Sainteté nonobstant toutes ces raisons, iustes & apparentes, vueille reiecter au loin mon Roy, pour ne le recevoir en l'Eglise de Dieu? Certes ie crains, que si elle le fait, elle n'en soit blasmée, & qu'ē fin elle n'ait regret de l'auoir fait, mesmes lors qu'elle verra aduenir par telle occasion les miseres susdites. Car chose certaine est, que tandis que les guerres ciuiles

continueront; la discipline Ecclesiastique se perdra, comme nous voyons qu'elle fait depuis la prise dernière des armes que ceux de la Ligue ont fait en Ianuier 1589. Je supplie donc tres-humblement vostre Sainteté pour fin de ce mien escrit, de vouloir considerer cet affaire mieux qu'elle n'a fait iusques à present; afin de tenir en paix toute la Chrestienté; & la reünir au deuoir qu'elle doit. Et pour mon particulier, si par mesgarde i'ay escrit quelque chose qui desplaise à vostre Sainteté, ie la supplie tres-humblement de me le pardonner, & attribuer le tout à la grande affection, voire passion, que i'ay en cet affaire, pour me voir en danger d'estre ministre & faire effect possible du tout contraire à celuy que i'ay pretendu, venant trouuer vostre Sainteté, & par consequent de laisser vne memoire funeste à la posterité, & possible creance à ceux qui ignoreront ce que particulièrement i'ay traicté à vostre Sainteté, & ledict sieur Cardinal de Toledo, que ie ne m'y sois comporté comme ie deuois faire; pour induire vostre Sainteté à flectir sa volonté en l'endroict de mon Roy en chose si iuste & raisonnable: car ç'a esté

vn tres-grand mespris que de n'auoir voulu me donner aucune respōce, & croy que vostre S^{ae} le cognoistra pour tel, lors qu'el le y aura vn peu mieux pensé, & m'excusera, s'il luy plaist, si i'ay dit plus que ie ne deuois, & croira que ie l'ay faict seulement pour pēser de me descharger enuers Dieu & le monde de ce qui aduiendra, ayāt faict cognoistre qu'il n'a tenu à moy de rechercher tous les moyens possibles pour vous faire prendre telle resolution qu'il est expedient.

Si donc, Pere Saint, i'ay outrepassé mon deuoir, ie vous en demande de rechef pardon, & supplie tres-humblement vostre Saincteté de ne m'en vouloir mal, ains de receuoir le tout en bonne part, cōme prouenant d'un cœur desireux, qu'il vous plaise reiecter au loing le mauuais conseil qui vous est dōné, & prendre celuy que ie vous ay proposé du tout esloigné d'intrest particulier, & doué des qualitez requises pour vous donner aduis conforme au grand besoin present. A quoy me recognoissant ne pouuoir faire d'auantage que ce que i'ay faict, ie finiray, en baissant tres-humblement les pieds de vostre Saincteté,

Discours de la Legation

& adressant ma priere au Sauueur du mō-
de pour le supplier,

PERE SAINT, de vous donner vn
bon conseil, & inspirer à faire telle reso-
lution qu'il est requis & necessaire pour
le bien de la France, & de la Chrestienté,
& particulièrement du sainct Siege de
Rome. Ce 14. Ianuier 1594.

Vostre tres-humble & tref-
deuot seruiteur,

LODOVICO GONZAGVE.

Lettre du Roy à nostre Sainct pere, pre-
sentee par le Sicur de la Cliche.

TRES-SAINCT PERE, Ayant par l'inspi-
ration qu'il a pleu à Dieu me donner, recogneu
que l'Eglise Catholique, Apostolique, & Romaine
est la vraye Eglise, pleine de verité, & où gist le sa-
lut des hommes, conforté encores en ceste foy &
creance par l'esclaircissement que m'ont donné les
Prelats & Docteurs en la saincte faculté de Theo-
logie, que i'ay à ceste fin assemblez, des points qui
m'en ont tenu separé par le passé: Je me suis resolu
de m'vnir à ceste saincte Eglise, tres-resolu d'y vi-
ure & mourir avec l'aide de celuy qui m'a faiect la
grace de m'y appeller. Et pour donner commencemēt
à ce bon œuvre, apres auoir esté receu à ce faire par

lesdits Prelats avec les formes & ceremonies qu'ils ont iugé estre necessaires, auxquelles ie me suis volontiers souzmis, le Dimanche 25. Iuliet, i'ay ouy la Messe, & ioinct mes prieres à celles des autres bons Catholiques, comme incorporé en ladicte Eglise, avec ferme intention d'y persueuer toute ma vie, & de rendre l'obeissance & respect deu à vostre sainteté, & au S. Siege, ainsi qu'ont fait les Rois tres-Chrestiens mes predecesseurs. Et m'assurant, Tres-sainct Pere, que vostre Sainteté ressentira la ioye de ceste sainte action, qui conuient au lieu où il a pleu à Dieu la constituer: I'ay bien voulu, attendant que sur ce ie luy rende plus ample deuoir, comme d'as peu de iours ie deputeray à cet effect vers elle vne Ambassade solempnelle, & de personnage de bonne & grande qualité, luy donner par ce peu de lignes de ma main ce premier tesmoignage de ma deuotion filiale enuers elle, la suppliant tres-affectueusement l'auoir agreable, & receuoir d'aussi bonne part cõme elle procede d'un cœur tres-sincere & plein d'affection, de pouuoir par mes actions meriter la sainte benediction. Et sur ce, tressainct Pere, ie prie Dieu qu'il vueille longuement maintenir vostre sainteté en tres-bonne santé, au bon gouuernement de sa sainte Eglise. De Saint Denis ce 18. iour d'Aoust 1593. Et plus bas est escrit,

Vostre bon & deuot fils, HENRY.

Autre lettre de sa Majesté presentee par
le Duc de Nivernois.

TRESSAINCT PERE, Apres quil a plu à Dieu nous appeller à la cognoissance & communion de sa sainte Eglise Catholique, Apostolique & Romaine, & la protestation que nous auons faicte dy viure & mourir, rien ne nous peut estre plus cher, ny de plus grande consolation en nostre esprit pour parfaire nostre contentement de ceste sainte action, que de la voir approuuee & auctorisee de la benediction de vostre Saincteté, en luy rendant de nostre part le deuoir qui luy appartient, dont desirant nous acquitter avec tout lhonneur & respect enuers vostre Saincteté que nous pouuons: Nous auons à cet effect choisi la personne de nostre tres-cher & bië amé cousin le Duc de Neuers, pour l'esperance que nous auons que les excellentes & vertueuses qualitez qui sont en luy, specialement illustrees de singuliere pieté & deuotion à la religion Catholique, rendront ceste nostre eslection, & la charge qui luy est par nous commise, d'autant plus agreables à vostre Saincteté, l'un des principaux points de sadiète charge, estant de prester à vostre saincteté, & au saint siege Apostolique en nostre nom l'obedience que nous luy deuons comme Roy de France tres-Chrestien, qui ne desire moins imiter

l'exemple des Roys noz predecesseurs à meriter le tiltre & rang de premier fils de l'Eglise par noz actions, qu'ils ont esté soigneux de l'acquérir & conseruer.

A CESTE CAUSE, Treßainct Pere, nous supplions tres-affectueusement vostre saincteté, que le bon plaisir d'icelle soit accepter & receuoir cet office & deuoir qui luy sera de nostre part rendu par nostre-dit Cousin, avec les submissions deues & accoustumees, comme s'il estoit par nous fait en personne, & adiouster foy & creance à tout ce qu'il luy dira & fera entendre de nostre-dite part, tant pour ce regard que d'autres choses, tout ainsi qu'il luy plairoit faire à nous mesmes. Sur ce nous prions Dieu, Treßainct Pere, &c.

*Memorial ou requeste presentee à sa Saincteté,
par le Duc de Nyvernois.*

TRES-SAINCT PERE, Le Duc de Neuers enuoyé vers vostre Saincteté par le Roy mon Seigneur, vous remonstre en toute humilité de la part de sa Maiesté, qu'ayant ledict seigneur Roy erré long temps en la foy (dont il est tres-marry, & s'en repent de tout son cœur) & sur les ad-

monitions qui par fois luy en estoient faites, désiré tant de bouche priuement que par escripts publicz & imprimez depuis plusieurs années, demandé d'estre instruit sur les poincts controuers, protestant de ne vouloir demeurer obstiné, ains d'estre prest à receuoir & embrasser celle qui luy seroit monstree estre la vraye foy & Religio: Les Princes du sang & autres Princes, avec les Ecclesiastiques, Seigneurs, Gētilshommes & autres Catholiques vnis ensemble dès le temps du tres-Chrestien & tres-Catholique Roy Henry troisieme, pour la deffence de sa maiesté tres-Chrestienne, & de l'Estat & Couronne de Frâce, enuoyerent l'année passée vers ce Sainct Siege, source de toute bonne doctrine & instruction, & vers vostre Saincteté le Marquis de Pisany, pour la supplier de leur commander ce qui luy sembleroit deuoir estre fait pour la vraye & pleine instruction & conuersion qu'ō desiroit d'une personne si signalee, afin que toutes choses y passassent avec les formes deues, & principalement avec l'auctorité & bon plaisir de vostre Saincteté, & qu'il n'y fust rien obmis de tout ce qu'elle iugeroit estre conuen-

ble, & ce pendant le Roy continua la communication qu'il en auoit ia commencee avec des personnes doctes, Catholiques & pies, & d'elles apprint pour la pluspart que elle estoit la vraye doctrine & Eglise de Dieu. Et n'ayant vostre Sainteté en vn si long temps voulu dōner audience au susdit Marquis au nom d'iceux Princes, Prelats, Seigneurs, Gentils-hommes & autres, tous Catholiques & tresdeuots à ce Saint Siege: Et sa Maieité ne voulant, ny deuant plus longuemēt demeurer en la voye d'erreur, ains au plustost consommer la susdite instruction, & se confirmer en tout & partout en la vraye foy, & venir à la reunion de l'Eglise de Dieu, conuoqua nombre de Prelats, Theologiens, & autres Ecclesiastiques du Royaume, & par iceux à plein instruiēt, & confirmé que la foy & l'Eglise Catholique, Apostolique & Romaine est la seule vraye foy, & la vraye Eglise de Dieu, hors de laquelle il n'y a point de salut: a en presence d'iceux Prelats, & de plusieurs desdits Princes & Seigneurs, & de plusieurs milliers d'hommes, abiuré les erreurs passees, & faict profession de la susdite foy Catholique, Apostolique & Romai-

ne. Et iceux Prelats n'ayans peu receuoir les commandemens de vostre Saincteté, ny sçauoir son intention, recherchee avec si longue instance, par le moyen du susdict Marquis de Pisani, & trouuant que ledict seigneur Roy de plusieurs chefs estoit aux termes esquels par les saints Decrets, & par l'aduis des Docteurs vieux & modernes, les Euesques, voire les simples Prebstres peuuent & doiuent absoudre les penitens des cas reseruez au siege Apostolique, luy ont pour la necessité du tēps, & pour euitter plusieurs inconueniens qui pouuoient aduenir d'vne plus longue dilation, impartyle benefice d'absolution, luy enioignant neantmoins, & luy faisant promettre selon la forme de droict, que cessans les empeschemens legitimes il enuoyast à Rome vers le sainct Siege Apostolique, & vostre Saincteté, pour receuoir humblement & obeir à ce qui luy seroit ordonné & commandé par elle, de laquelle conuersion sa Maiesté a donné aduis & rendu compte à vostre Saincteté par vn sien Gentil-homme expres, & par lettre escrite toute de sa main, que vostre Saincteté receut par les mains du susdict Gentil-homme à S. Marc
le

le treziesme Septembre, & maintenant iceluy Seigneur Roy obtemperant à la susdite inionction & promesse, & aussi par sa propre deuotion enuers ce Sainct Siegē & vostre Saincteté, a pour ladicte fin enuoyé aux piedz de vostre Saincteté le susdict Duc, lequel ayant donné à vostre Saincteté le vingtcinquiesme Nouembre la lettre de creance de sa Maiesté, & exposé la consolation que sa Maiesté sentoit en son ame de sadite conuersion, & le ferme propos auquel il est de viure & mourir fils obeissant & zellé de ce Sainct Siegē, & de vostre Saincteté: Et l'ayant encores supplié de luy donner audience pour introduire à ses piedz les Prelats deputéz par les susdits Ecclesiastiques, & enuoyez par sa Maiesté à vostre Saincteté, pour luy rendre compte de tout ce qui s'y est fait & passé à present au nom d'iceluy Seigneur Roy, supplie tres-humblement & tres-instamment vostre Saincteté, que comme vicaire de nostre Seigneur Iesus Christ (qui non seulement ne reiecte ceux qui viennent à luy, mais aussi cōue & appelle à soy tous ceux qui se sentēt trauaillez & greuez, & s'offre à les soulager & refaire) & comme succes-

Discours de la Legation

seur de Saint Pierre (lequel ayant à estre
pasteur de l'Eglise vniuerselle, Dieu permit
que trois fois il niaist Iesus Christ, afin qu'en
sa propre coulpe il apprint à auoir pitié
des autres pecheurs) il luy plaise agreer
ce qui a esté faict par sa Maiesté, & par les
susdicts Prelats en ladicte cōuersion & ab-
solution, & luy ordonnant comme Pere
misericordieux, ce qu'il doit faire, luy don-
ner sa sainte benediction, & en tout eue-
nement, & pour plus grande assurance de
sa conscience vouloir par sa paternelle be-
nignité & bonté luy pourueoir, & luy don-
ner absolution, & telle expedition & re-
mede dont il pourroit auoir besoin pour
le salut de son ame.

Signé, **LODOVICO GONZAGUE.**

*Autre memorial faiët presenter à sa Saincteté, de
la part dudiët Duc de Nyuernois, par
Monsieur le Maistre de la chambre
de sa Saincteté.*

TRES-SAINCT PERE, Le Duc de Ne-
uers pour moins ennuyer vostre Sain-
cteté, les festes estans si proches au lieu d v-
ne audience, il la supplie tres-humblement
par ce peu de lignes, qu'il plaise à vostre
Saincteté donner responce sur le memo-
rial qu'il luy presenta le cinquiesme de ce
mois. Et ce d'autant plus que le bruit est
commun qu'au consistoire de Lundy der-
nier vostre Saincteté declara au sacré col-
lege, la resolution qu'elle auoit pris sur ce
tres-important affaire. Et à celle fin que le-
diët Duc puisse rapporter au Roy son Sei-
gneur à la vraye verité, & clairement la vo-
lonté de vostre Saincteté. Et pour sa plus
grande descharge il la supplie en toute hu-
milité que ce soit son plaisir de luy faire
donner ladiët respōce par escrit. Et lediët
Duc prie Dieu qu'il donné à vostre Sain-
cteté les bonnes festes, & tres-longue &
tres-heureuse vie.

Signé, **LODOVICO GONZAGVE.**

BRIEF DE LA SAINCTETE
AV DVC DE NIVERNOIS.

CLEMENS PAPA VIII.



*Illeſte fili nobilis vir ſalutem &
apostolicam ben. Exponet manda-
to noſtro dilectus filius Antonius
Pouſſeuinus ſacerdos ordinis ſocietatis Ie-
ſu, vir grauis & prudens, ea quæ tibi per
eum ſignificanda iudicauimus: eius verbis
fidem tribues. Datum Romæ apud San-
ctum Marcum ſub annulo piſcatoris, die
xix. Septembris anno 1593. Pontificatus
noſtri anno ſecundo.*

ANT. BUCCAPADVLIVS.

*Superſcriptio. Dilecto filio nobili
viro Duci Niuerniæ.*

Extrait du priuilege du Roy.

PAr priuilege & grace speciale du Roy, il est permis à Iamet Mettayer, & Pierre l'Huillier, Imprimeurs ordinaires de sa Maiesté, d'imprimer ou faire imprimer, & mettre en lumiere, *Le discours de la Legation de M. le Duc de Neuers*, enuoyé l'an 1593. par ledict Seigneur vers le Pape Clement V I I I. Et iceluy Discours imprimé en tel volume & caracteres que bon leur semblera, vendre & distribuer par tout le Royaume de France, & terres de l'obeissance de sadicte Maiesté, durant le terme & temps de dix ans, commençant du iour & datte que la premiere impression en sera acheuee. Et pour ne frustrer lesdits Iamet & l'Huillier de leurs peines & labeurs, & les indamniser de toutes pertes & doinnages, est expressement par ledit priuilege defendu à tous autres Imprimeurs, Libraires, Marchands, & autres personnes dudit Royaume, & terres de l'obeissance de sadite Maiesté, d'iceluy Discours imprimer, ou faire imprimer, vendre & distribuer, si ce n'est du gré & consentement desdits priuilegiez, sur peine de confiscation, perte de l'impression, & d'amende arbitraire, comme il est plus à plein contenu és lettres de priuilege obtenues par eux à Paris, en datte du 28. Iuin, l'an de grace 1594. Signees, Par le Roy en son Conseil. Et plus bas, **H A B E R T.** Et sceellees de cire iaune à double queue.

















